

ZERA RECHECHI YESMIRNA

 Baba vane kuBwinya kukurusa, tinofara kwazvo manheru ano kuziva kuti matiri pauzima tine Hupenyu husingafi. Hupenyu hwaMwari vedu hwakapatsanurwa nendimi dzemoto ndokugara pamusoro pemumwe nemumwe wavo, uye vakazadzwa vose neMweya Mutsvene ndokutanga kutaura nedzimwe ndimi sekutaura kwavakapihwa neMweya Mutsvene. O Baba, tinoKutendai sei kuti makazvipatsanura pacheNy u pakati peChechi. Ndosaka Ishe vedu vakati, "Nezuva iroro muchaziva kuti Ndiri muna Baba, uye Baba vari maNdiri, Ini ndiri mamuri, uye imi muri maNdiri." Kuti Mwari veKudenga vanogara sei pakati pevanhu vaVo! "Kwechinguva chiduku uye nyika haizoNdioni zvakare, asi imi muchaNdiona, nekuti Ndichave nemi, kunyangwe mamuri kusvika kumagumo enyika." Zvichidzika nemuzera roga-roga rechechi Maizova pano, mumwe chete zuro, nhasi, nekusingaperi, uye taizoKuzivai nemabasa aMunoita. "Zviratidzo izvi zvichatevera avo vanotenda."

² Ishe, tichiona—tichiona nhongonya yemazera ose, nguva yava kuda kupera uye Ziyendanakuenda rava kupinda. Mwari Baba, tinotenda kwazvo kuziva kuti tiri kurarama mune vakasara ivavo nhasi; takatarisa hupenyu hwedu uye nekuona mhando yevavariro yatinayo, zvinangwa zvatinazvo, uye nokuona kuti Mweya Mutsvene watora hutongi. Mwari, dai munhu wese ari muHupo hwaMwari manheru ano acherechedza mazera echechi aya atiri kurarama maari uye atizire nekukurumidza kuna Ishe Jesu, nekuti zvakanyatsonyorwa zvakajeka, kuti, "Zita raJehovha inhare yakasimba, vakarurama vanomhanyira maIri uye vakachengeteka."

³ O Mwari, huyai manheru ano mutizodze isu pauzima, Ishe. Unzai varitairi, O Ishe, vakavhiringidzika kwazvo; tarirai makwai anonzwisa urombo, Ishe, haazivi zvekutenda; pane kudana kwevafudzi kunobva kwese-kwese. Tinonamata, Baba, kuti vagonzwa iyeye Mufudzi mukuru wemakwai, Ishe Jesu, Mweya waKe mukuru uchitaura manheru ano, uchiti, "Mwana waNgu, huya kwaNdiri uye Ndichakupa Sabata, Zororo rinokusimbisa kusvika kumagumo ako emuZiyendanakuenda." Kwete kupeperetswa kwese-kwese panyika apo tichiona nguva ichipera zvino. Zviitei, Baba. Taurai kubudikidza nemutauri, teerera kubudikidza nenzeve dzeavo vanonzwa, nekuti tose takateerera. MuZita rajesu tinonamata. Ameni.

⁴ Munogona henyu kugara. Zvino, manheru ano tiri kudzidza pazera rechechi rechipiri. Ndinoona vazhinji vavo vachitora zvinyorwa nezvinhu, uye ndicho chikonzero ndiri kuda kuzvijekesa nguva imwe neimwe.

⁵ Zvino, zera rechechi rechipiri rainzi zera rechechi reSmirna. Uye rakaitika, Zera reSmirna, rakapinda panguva imwe chete yakabuda Zera reEfeso. Zera reEfeso rakabva muna A.D. 55 kusvika A.D. 170. Zera reSmirna rakauya pana 170 uye richienda kuna 312. Chechi iyi chechi inotambudzwa; iyo inopfeka korona yevanofira chitendero chavo, chechi yekutambudzwa. Uye vimbiso yaMwari kwairi, kuChechi yakasanangurwa iri mairi, kwaiva kuipa korona yeHupenu.

⁶ Chechi yega-yega yaiva *nenyeredzi* yaive yakabatwa muruoko rwaMwari, yaimiririra "mutumwa" kuzera iroro rechechi. Wandaigona kufunga zvakakanakisa aiva mutumwa pazera rechechi reEfeso (nekuti Bhaibheri haritauri kuti ndivana ani) aiva Pauro; nekuti akavamba chechi yeEfeso uye aiva mushumiri wezera rechechi iroro; ndokuunza Chiedza kuChechi, naMutsvene Johane akazopfuirira naro kubva ipapo. Uye tevere Polycarp, uye zvichienda zvichidzika... Polycarp, waro, zvichienda zvichidzika.

⁷ Zvino, Zera reSmirna, ndinotenda nezvose... kuti wandakakwanisa kuwana, aive Irenaeus. Uye zvino ndinoda kukupai chikonzero chekuti sei ndakasarudza Irenaeus pachinzvimbo chaPolycarp. Zvino, vafundisi vazhinji vose vanoda kufunga (uye nevadzidzisi veBhaibheri) kuti ngirozi iyoyo yaive Polycarp. Polycarp aiva mudzidzi waMutsvene John, ichokwadi. Uye Polycarp akasimbisa... iye—iye aiva akafira chitendero chake, vakamubaya mumoyo chaimo vakamuuraya. Zvino, asi aiva murume mukuru, murume ane chiremerera, murume ane humwari, anotapira. Pasina kupokana mumwe weMakristu makurusa watati tambova naye. Uye paiva pasina chakaipa chawaigona kutaura nezve hupenu hwake.

⁸ Chikonzero chandakasarudzira Irenaeus: nekuti ndinotenda kuti Irenaeus aiva pedyosa neRugwaro kupfuirira zvaiva Polycarp. Nekuti Polycarp aiita sekarerekera kupfungwa yechiRoma yekugadzira sangano. Uye—uye Irenaeus aizvipikisa zvakasimba, aizviramba zvemazvirokwazvo. Uyezve, sekuziva kwatinoita tose, nyaya huru yaiuya paKanzuru yepaNicaea; imwe yenyaya huru yaiva yekuti Mwari aiva *vatatu* here kana kuti Mwari aiva *mumwe*. Zvino Irenaeus akatora divi rekuti Mwari vaiva Mwari, zvino, achingori Mumwe chete.

⁹ Ndingangoverenga kubva mu*The Ante-Nicene Fathers*, bhuku rokutanga, peji 412, kachinokorwa kadiki chete; kana muchida kuzvinyora pasi, bhuku rokutanga re*The Ante-Nicene Fathers*. Uye papeji regumi nemaviri, uye ndiyo... Kana muchida bhuku racho, ndeicho chikamu chekupedzisira chebhuku rechitatu. Munogona kuverenga chinhu chachcho chose; pane zvitsauko zvakawanda zvazvo, kana mitsara yakawanda. Zvino ndinotanga kuverenga kwekedzisira chaiko—kwekedzisira chaiko kwendima makumi maviri,

makumi matatu dzaro. Handizozviverenga zvose, asi chikamu chazvo chete:

“Zvimwe zvita urwa zvose saizvozvovo zviri... zvinoburitsa dunhurirwa remumwe chete uye ari Munhu mumwe chete;” (Munoona, ari kuedza kutaura zvavakaMudana, ‘Baba, Mwanakomana, neMweya Mutsvene,’ uye akati, “*Madunhurirwa*, kwete mazita, madunhurirwa eMunhu Wacho mumwe chete.” Ndizvo chaizvo zvatinodzidzisa nazvino nhasi uno.) “toti, semuenzaniso” (uye zvakare mumabhuraketsi) (“muChirungu), *Ishe veSimba, Ishe Baba wavose, Mwari Samasimba, WeKumusoro-soro, Musiki, Mugadziri*, nemamwe akadaro. Aya haasi mazita nemadunhurirwa ekutsivanisana kwevanhu vakasiyana, asi emumwe uye mumwe chete,” (Ameni!) “ane zita iro rokuti Mwari mumwe chete, Baba, ndivo... Ivo— Ivo avo zvinhu zvose izvi... vanopa kune vese... rekurarama, ropafadzo rekurarama kwese.”

¹⁰ Irenaeus anotaura kuti “*Madunhurirwa ese aya anobatanidzwa pamwe muZita rimwe, pasi paMwari mumwe chete, uye anongova madunhurirwa ezvaAiva ari.*” Aiva Ruva reSharoni. Ndizvo zvaAiva. Iroro idunhurirwa. Aiva Nyamatsatsi yeMangwanani. Aiva Arfa. Aiva Omega. Iwayo madunhurirwa ezvaAiva. Aiva Baba. Aiva Mwanakomana. Aiva Mweya Mutsvene. Asi kuna Mwari *mumwe*. Mwari mumwe, uye Zita raKe ndeRimwe. Uye ndicho chikonzero chimwe chete chandakafunga kuti Irenaeus akagona mune yake—mune ongororo yake pano apa, kana kuti dudziro yeRugwaro.

¹¹ Chimwe chinhu chandinoda kukuverengerai, chinowanikwa mubhuku: *Zvakaitika Sei?* Uye iri ndere vanyori venhoroondo. Uye, *Zvakaitika Sei?* naR. C. Hazeltine, nhoroondo yemachechi epakutanga. Uye pano papeji 180: “*Zvipo ZveMweya Munguva YaIrenaeus, A.D. 177 kusvika 202.*” Zvino, chikonzero ndiri kunokora izvi, zviri kuenda patepi, munona, uye—uye zvichazobviswapo zvoiswa pamabhuku:

“Maiva munguva yaIrenaeus yekuti akawanda machechi echiaPostora emuFrance aiva nezvipo zvose zveMweya Mutsvene.” Zvakabva kwaari achidzidzisa, munona. “Nhengo dzechechi yaIrenaeus paLyon,” ndiyo Lyon, France, “vaitaura nendimi. Zvaisava zvinhu zvisina kujairika kuona mumwe munhu akafa achidzoswa kuhupenyu. Kupodzwa kwaive—kupodzwa kwaive chiitiko chamazuva ose mune kuvhangera kwose... machechi ekuvhangera kwese-kwese.” Kuti Irenaeus aiziva madzidzisiro! “*Zvishamiso zvaiitika kakawanda. Chaizvoizvo, machechi iwayo haana kumbobvira agara asina munana wekuratidza kwehupo hwaMwari kubudikidza nechiratidzo, kumiswa kwezvihu zvakasikwa, muchishamiso, kurangaridza Makristu eevhangeri ezuva iroro, kuti vaiva vadzidzi vaKe vanodikanwa.* Asi kubva munhoroondo dzekare,

hatigoni kunhongeredza chitiiko chimwe zvacho chekumutsa vakafa muchechi yekutanga yeRoma.”

¹² Ndivo vanhu vasinga... vasina chero divi ravakarerekera, vari kungotaura chokwadi. Vanyori venhoroondo.

¹³ Ndosaka ndichifunga kuti Irenaeus, nekuti, munoona, aive nekutenda kumwe chete uko Pauro nevadzidzi vakanga vagamuchidza. Ndosaka ndine... kutenda kuti aiva mutumwa wechechi yeSmirna, nekuti aiva... aiva nedzidziso imwe chete yeMagwaro; uye dzidziso imwe chete yeMagwaro pamusoro pehwaro hweShoko raMwari inoburitsa chinhu chimwe chete nguva dzose. Kana ukangotora chete nzira yaMwari nekuuita nemo-nemo, zvisinei nokuti machechi anoti chii, ingoitevedzera nenzira chaiyo yarakataura, inoburitsa chinhu chimwe chete. Zvino ndizvo zvakaitwa naIrenaeus.

¹⁴ Zvino, ndinofunga kuti Polycarp aiva murume akanaka, ndinonzwisisa; asi ndinotaura kuti aive akarerekera zvakanyanyisa kuti aite chechi sangano, uye sezvaiitwa nevaNikoraiti. Vainge vachiita chechi kuti ive sangano, uye— uye nekuunza hukama hwehama pamwe chete. Zvinoita sezvakanaka papfungwa, asi, munoona, Mweya uri kumberi-mberi kwazvo kwepfungwa kusvikira... hautombogoni kufunga zvakanaka ku—kuMweya. “Pfungwa dzaNgu dzepamusoro dziri pamusoro kupfuura pfungwa dzenyu,” ndizvo zvinotaura Mwari. “Nzira dzaNgu dzakakwirira kupfuura nzira dzenyu.” Saka pane nzira imwe chete yekuzviita; chingoVatevera nenzira yakatarwa. Ndizvozvo chaizvo.

¹⁵ Zvino, tinogona kufunga, toti wanga uri kuenda uchibva pano... Kana ndaive ndichienda kuChicago manheru ano, ndinogona kubuda muno ndozviwanira kambasi, ndoti, “Zvino ngationei, Chicago yakanyatsogara nenzira iyi. Zvakanaka, ndave kuchienda ikoko.” Ndaisazobuda muJeffersonville. Maona? Ndinofanira kuti ndizviwanire mepu yenzira. Uye kune—kune... nzira yakatarwa yekuti ndinogona kuenda kuChicago mumaaawa matanhatu kana manomwe erwendo nemotokari, asi handingokwanisi kudimbudzira nechero nenzira. Ndege haingokwanisi kuchekerera nechero gwara; ine—ine gwara remuchadenga kana humwe hurefu mudenga nezvinhu painofanira kubhururukira iri, zvemamwe madhigiri ainofanira kugara iri maari.

¹⁶ Pane nzira yakagadzirwa, uye Mwari vane nzira. Mwari vane nzira yeChechi yaVo, yevanhu vaVo. Uye haVana kumbobvira vada kuti Itungamirirwe nana papa, makadhinari, maachibhishopi, kana vatariri vakuru. Mweya Mutsvene ndiwo Mudzidzisi weChechi yaMwari mupenyu, kuti alkudze. Uye hutsvene hwese hauendi kumukadhinari kana muprisita, kumuita munhu mutsvene mu—muchechi, chero chinhu. Ungano ine kodzerowo... kodzero chaiyo kuMweya Mutsvene sechero

muparidzi, mufundisi, mudhikoni, mutirastii, chero ani zvake. Ungano!

¹⁷ Uye chikonzero vanoridana kuti vaNiko-raiti... Sezvatakava nazvo husiku hwapfuura, chiNikoraiti, takapatsanura shoko racho uye tikaritora kubva muchiGiriki. Zvino N-i-k-o, zvaireva... *Niko*, zvinoreva "kukunda kana kukurira." Chii? N-i-k-o, muNiko-raiti, *ungano*. "Kukunda ungano," nekuikurira nekuvapa hurongwa hwevanhu, vafundisi vaizovadzidzisa uye vaizo...vaizoisa mhedzisiro dzavo ivo pamwe chete. Ndiwo maitirwe akaitwa Kanzuru yepaNicaea. Nekuti vazhinji vakauya pamwe chete ndokugadzira hurongwa muKanzuru yepaNicaea. Hatisi... hatidi kutaura zvakawandisa nezvavzo, nekuti ndezve China manheru, muKanzuru yepaNicaea.

¹⁸ Asi ndipo pakavambwa Chechi yeRoma Katorike, kubva muboka revanhu vaive vakatendeutswa naMutsvene Pauro, naIrenaeus, naMutsvene Martin, uye zvichienda zvichidzika. Vaive Makristu akatendeukira kune...kubva kuchihedheni kuuya muChikristu, asi vaida kudhonzerza chechi muchimiro cheshumiro yemuTestamende Yakare, sekuva nevapriska vakuru, uye—uye nekutsivana kwevaapostora, sapapa mumwe zvichienda kune mumwe papa, mumwe papa. Kana taigona kuramba tichidzika nemuBhaibheri iri, maizoona kuti ndicho chokwadi chaicho uye kuti Mwari vakapomera chinhu chacho sei kubva kumavambo; uye zera rechechi rehusiku hwapfuura, akati, "Ndakazvivenga!" uye ndizvo zvakaitawo Chechi.

¹⁹ Mwari havana kumbobvira vakada kuti Chechi ifambiswe nevanhu. Mwari vanofambisa Chechi yaVo, uye Vanoifambisa kubudikidza nezvipo zveMweya. Zvipo zveMweya zviri muChechi kuti zvigadzirise mweya. Vane mahofisi mashanu ehushumiri muChechi yaVo. Yekutanga yaho vaapostora, kana, mamishinari. Mumishinari ndiko kudanwa kwepamusoro-soro kuriko, muapostora. Izwi rekuti *mumishinari* rinoreva "uyo wakatumwa"; *muapostora* rinoreva "uyo wakatumwa." Chavakambosarudzira kudanwa kuti mumishinari, handizivi. Asi vaapostora. Zvakanaka. Vaapostora, vaporofita, vadzidzisi, vavhangeri, vafundisi. Zvino, ndiwo mahofisi akasarudzwa aMwari kuChechi yaVo.

²⁰ Zvino muchechi yepanzvimbo yoga-yoga kune zvipo zvipfumbamwe zvinouya pakati pevanhu, zvinova, zivo, huchenjeri, zvipo zvekuporesa, kushanda kweminana, kutaura nendimi, kududzirwa kwendimi. Uye zvinhu zvose izvi zvinopinda mumutumbi wega-wega wepanzvimbo. Uye munhu wese muchechi ane shumiro yake pachake, uye shumiro yake iyoyo inoenderana pamwe chete nedzimwe shumiro dzose, kusimudzira Mutumbi waJesu Kristu. Uye kusatombo...

²¹ Zvino, rangarirai izvi, kuti pano ndipo...Ndichadhirowa mitsara iyi manheru ano. Chechi yekutanga, Efeso; Smirna, Pergamo, Tiatira, Sadhisi, Firadherfia, Raodhikia. Zvino, rangarirai izvi zvichienderera mberi, chechi *iyi* yaive nehuzaro hweMweya, asi pamagumo ezera rechechi tinoona kuti Waimanikidzirwa kunze. Zera rechechi rinotevera rakamanikidzira zvakati wedzerei zvishoma; zvakati wedzerei zvishoma; kusvikira *iri*, pakanga pangova nekadodzi kadukuduku chaiko. “Une zvinhu zvishoma,” Akadaro. Oo, patinosvika kuZera iroro reChechi reTiatira!

²² Zvino, mushure maizvozvo kwakauya, Mwari vakasimudza muJerimani ane zita rekuti Martin Luther akadzosa Chechi zvakare. Yakatanga ichiwedzera zvishoma, akaparidza Kururamiswa; kwakabva kwauya Martin Luther, akaparidza Kururamiswa. Kwakabva kwauya John Wesley ndokuparidza Kucheneswa. Zvino muzera iri rechechi *pano*, vakadzoka chaiko zvakare kuRubhabhatidzo rweMweya Mutsvene zvakare, nezviratidzo nezvishamiso zvimwe chete, zvichidzika zasi chaiko. *Apa* ndipo pazvakabuda kubudikidza nemumakore chiuru nemazana mashanu emaZera eRima. Uye ndipo apo rima gurusa...kana mwaka wakarebesa wechechi watakava nawo mumazera echechi. Zvino *apa* ndipo painotanga kuuya, Kururamiswa, Kucheneswa, Rubhabhatidzo rweMweya Mutsvene. Uye Bhaibheri rakataura kuti, “Mukupera kwezera *iri*, kuti vashoma-shoma ava pano vachaiswa pakamanikana nekuti chechi imwe cheteyo yePentekosta ichatanga kuita chinhu chimwe chete chavakatanga kumashure *uku*, vaNikoraiti.” (O Mwari, regai ndivhare muromo wangu kusvikira ndasvika kwazviri.) Muri kuona? Zvandinogona kuona apo. Munoona, kusvikira mave kugona kuona apa. Uye ndichakuratidzai kuti mutumwa kuzera iri rechechi achavenga masangano. Mweya uchasimuka muvana. Zvagara zvakadaro. Uye zvino tine...

²³ Zvino, kana mukacherechedza izvi, kuti Waive wakakura sei apa, ukabuda, uye pakupedzisira zvikaUdzipa uchibuda kunze nzira yose. Zvino Unotanga kudzoka. Luther akaUdhonza uchidzoka, Kururamiswa; Kucheneswa; Rubhabhatidzo rweMweya Mutsvene; uye zvakare munguva yacho yekuguma, anonyatsoUdzipa chaizvo, kusvika Uyu wawa kuda kusvika pakutopera zvachose, pane mushoma-shoma chaiwo ipapo, uye ndipo paanonadanidzira kuti “Kana Akasagurira basa panzira nekuda kweVasanangurwa, hakuzovi nenyama inoponeswa.” Maona? Hezvoka izvo, panguva yekumagumo chaiyo. Zvino chengetai izvi mundangariro.

²⁴ Zvino tiri kuzotanga paZera rino reChechi reSmirna. Chekutanga ndinoda kunyatsozvitsanangura pano pane rimwe bepa randi—randinaro. Zvino, zera rechechi rechipiri riri Smirna, uye ndinotenda kuti mose muchabvumirana neni

(kana kuti ndinovimba munodaro, kana nepakati, zvakadaro) kuti Irenaeus ndiye aiva nyeredzi kuzera iroro rechechi. Aiva mutumwa waMwari nekuti akatsvaira nyika, kupinda muFrance (Gaul), zasi imomo, uye akatanga machechi, uye imwe neimwe yawo yakamiswa parubhabhatidzo rweMweya Mutsvene, kutaura nendimi, kumutsa vakafa, kuporesa vanorwara, kumisa mvura inonaya, nekuita minana zuva nezuva. Vakaziva kuti Mwari mupenyu aigara pakati pevanhu. Ndiye aiva munhu waMwari, nekuti Jesu akati, "Hakuna munhu anogona kuita . . ." Kana kuti, va—vanhu vakati, "Hakuna munhu anogona kuita mabasa aya kunze kwekunge Mwari vanaye." Aiva Nikodhimo akaudza Jesu izvozvo.

²⁵ Zvino, guta rekutengeserana; nzvimbo yekutengeserana zvichienda kuLydia nekumadokero. Guta gurusa rechitatu muAsia, guta guru rechiteshi chengarava. Raizivikanwa nokuda kwehupfumi, matemberi, zvivakwa, zvikoro, zvemishonga nesainzi. MaJudha vaigara pa—paSmirna, uye vakavhangera kuvanhu vemuSmirna. Polycarp aiva mubhishopi wekutanga weSmirna. Polycarp nevamwe varanda vakatendeka vakaisa kutenda kwaMwari kwakadzama muvatendi vemuSmirna. Madzibaba echechi ekutanga vakapa kurudziro yeZvokwadi kuSmirna.

²⁶ Zera rechechi reSmirna, zita rechechi raiva Smirna, *Smirna*, waro, zvinoreva kuti "nduru," mura. Inobatanidzwa nevakafa, nekuti vaifa.

²⁷ Chechi yaitambudzwa, Mwari vakavadana kuti "vanotambudzwa." Mwari vakatarisa pamusoro pekutambudzwa kwavo, uye vakapa nyasha dzekuzvitakura. Vakatarisa pamusoro pekutambudzwa kwake, ndokuvapa kukunda pamusoro perufu. Vakatarisa pamusoro pehurombo hwavo, ndokuvapa hupfumi maVari. Chechi yeSmirna yakapfuura nemuvira remoto rematambudziko, asi, zvaive zvinonhuwira kwaVari. Ndivo Vakasara zvino, kwete chechi yose yeSmirna; Vakasara chete ndivo vandiri kutaura nezvavo. *Mazuva gumi ematambudziko* makuru anoreva "makore gumi ekutambudzwa kwakanyanyisa kune ropa."

²⁸ Handizivi kana ndichigona kuperengera zita iri, kana kuridudza, kana kuti kwete. Uyu ndiye aive mambo panguva iyoyo, ndinotenda kuti ndiye akauraya zvakanyanyisa kupfuura vose kubva panguva yaNero muna 67, D-i-o-c-l-e-t-i-a-n. Mugore ra 303 kusvika 312 A.D.

²⁹ Mwari vanokurudzira Smirna kuti ive yakatendeka kusvikira murufu, sezvaVakaita, "Uye Ndichakupa korona yeHupenyu, saBaba vakaNdipa." Mwari vakavimbisa mukundi (mumatambudziko) kukunda pamusoro perufu rwechipiri, "Usatyе avо vanogona kuuraya mutumbi, asi Uyo anogona kuparadza mweya, kana, kuuraya mweya." Iyo . . . VaSmirna

vaifanira kutsungirira kusvika kumagumo, “Usatyе vanhu, uye korona yeHupenyu ichapihwa iwe.” Kutambudzwa kweChikristu mumazera kunofanofananidzirwa mumazera echechi, eSmirna, kwakakosha zvikuru. Tichada kusvika kwazviri munguva shoma, Ishe vachitendera.

³⁰ Zvino, kana vamwe venyu vakapotsa zvimwe zveizvi apo...kana ndikazvinyora ndichiti kurumidzisei kune vamwe vose mukirasi, zvino ticha...tiri...zvirokwazvo munogona kuzwiwana kubva kватiri chero nguva ipi zvayo yamunoda, tichafara ku—kuzvipa kwamuri. (Ruregerero.)

³¹ Zvino pachitsauko 2 nendima 8, tinotanga manheru ano. Zvino, takamusiya ari pai manheru apfuura? Aiva zvirokwazvo...aivenga chiNikoraiti ichocho. Ndizvozvo here? Zvino Mwari vanoitei? Chii chatakaona kutanga? Chizaruro chaJesu Kristu, kuti ndiYe Ani uye nezvaAri. Zvino chinhu chikuru chinotevera, tinoona kuti Anovenga chero chinhu chinoisa chero chinhu pamusoro peChechi yaKe kunze kwaiye pachaKe. NdiMwari vane godo.

³² Ndingada sei kumira, nekuti tine ndima ina chete pano, kungonokora chimwe chinhu chidiki. Vangani vanogona kurangarira apo muporofita akanaka, Samueri, apo Israeri yose yaida kuita seimwe nyika yose? Munorangarira izvozvo here? Zvino muporofita akavaudza, akati, “Muri kukanganisa!” Asi vaida kuita sevaFirstia, uye se—sevamwe vose. Saka, ndizvo chaizvo zvakaitika muzera irori chairo rekutanga rechechi. Zvinoshamisa kuti vanhu havadi kuti Mwari avatungamirire. Vanoda kutevera...vanoda mumwe munhu. Israeri, yakaita mhosho hurusa yayakamboita, apo...Nyasha dzakanga dzatovapa muporofita, mutungamiri, dzikavapa gwayana seyananiso, nekuvapa chikafu kubva kumatenga, uye nezvinhu zvose zvakanaka izvo nyasha dzakanga dzavapa, uye zvakadaro, muna Eksodho 19, vaida murairo. Vaida kuita madhokotera edzidziso yebhaibheri, uye vova nevamwe varume, vaida kuva nechimwe chinhu chekuita maZviri, zvakare.

³³ Munhu ari kugara achida kukunda iye wacho Musiki akamusika, uye haana chaanoita kunze kwekuzviuraya pachake. SepamaSvondo mashoma akapfuura ndakaparidza pamusoro pechi—*Chinamoto Chemasanganiswa*. Uye ndizvo chaizvo. Kana ukasanganisa chero chinhu, hachimbogoni...chatopera! Chatopera, hachichakwanisi kudzoka zvakare. Nyurusu harigoni kubereka zvakare rova nerimwe nyurusu, nekuti iro—iro inyurusu, iro ndere masanganiswa. Chibage chakanaka, haugoni kurima chibage chakanaka kubva pachibage chakanaka chemasanganiswa. Hachitombo...Chinogona kubuda, asi chiri—chiri, oo, hachina kunaka zvachose. Haukwanisi kuzviita. Chero chinhu chipi zvacho chemasanganiswa hachina kunaka.

³⁴ Uye chinamato chemasanganiswa hachina kunaka! Chero bedzi uri kuedza kuwedzera chimwe chinhu kune zvakataurwa naMwari, kana kuita chimwe chinhu icho Mwari vasingadi kuti uite, chinamato chemasanganiswa. Chinogona kutaridzika zvakanaka. Oo, chibage chemasanganiswa chinokurira pakunaka chibage chiri semasikirwe. Nyurusi rakare rinokurira mabhiza maviri pakushanda. Saka, ndizvo... Hazvisi zvekushanda, hama, inyasha dzatinoponeswa nadzo. "Hatiponeswi nemabasa, asi nenyasha." Saka zvinogona kuti... Ndinovimba kuti hamufungi zvirevo izvi... Maka—makagara pasi pekumanikidzwa, uye ndi—ndinozvinzwa kumusoro kuno. Muri kuona? Nekuti pane Presbyteriani, Methodisti, nemhando dzose imo muno. Tinozviviza izvozvo. Uye saka ndi—ndinozvinzwa. Uye unofanira kumbozvinyevenutsa zvishoma pano neapo, wombozvizunza, tingati.

³⁵ Zvino, teererai. Chero chinhu chipi zvacho chemasanganiswa hachina kunaka. Unofanira kutora chepamavambo, nenzira iyo Mwari vakachigadzira, ipapo unozova nechimwe chinhu chamazvirokwazvo.

³⁶ Zvino, tinoona zvino kuti chechi iyi yeIsraeri, vachipfuura, Mwari vakanga vavapa zvokudya, uye nekuvariritira, uye nekuvaritira zvose. Uye pakupedzisira vakatarisa kuvaFiristia, nevaAmori, ne...nevakasiyana-siyana, ndokuti, "Tinoda mambo! Vane chimwe chinhu chatisina."

³⁷ Ndicho chinhu chimwe chete chinoita vanhu nhasi. Mumwe weidzi, hanzvadzi dzedu, anotarisa paterevhizheni oona Gloria Swanson, kana chero angava ani...vamwe vemadzimai iwayo vakapfeka imwe mhando yedhirezi, uye havatongogone kudzikama kusvikira wawana rimwe. Maona? Unoona mumwe mudzimai pakati pedhorobha, "Oo, hazviyemurike here?" Ko une hanyn'a nei nezvaanopfeka? Vanhu, vakangodaro, ndati izuva re—rekutevedzera, mumwe munhu anoda kutevedzera mumwewo. Ukatora...Kuna vanaElvis Presley vakawanda kwazvo zvino, ndi—ndinokuudzai, hawaikwanisa kuvarongedza vose mumatiroko, nekuti akava nemukurumbira mune zvenyama zvekue—...kutevedzera!

³⁸ Tine chinhu chimwe chete muchinamato. Izvo... Ndaiverenga nhoroondo yaMartin Luther, uye chero ani wenyu vanyori venhoroondo munoziva. Vakati chakange chisiri chinhu chaishamisa chekuti Luther aigona kupikisa chechi yeKatorike oshaya chaimuwana, asi chishamiso chikurusa, ndecekuti aigona kumisa musoro wake pamusoro pekupengerekwa kwe se kwaitevera rumutsiriro rwake uye oramba akamira neShoko. Ndicho chishamiso, kuti Mwari vakamuchengeta akajeka uye akatasuka.

³⁹ Zvino, saka vakauya kuna Samueri uyu. Vakati, "Tiitirei mupor...kana kuti tiitirei ma—mambo." Zvino Ishe

vakamuudza kuti Varamba pfungwa iyoyo, chaizvoizvo zvaVakaramba pano apa nesangano.

⁴⁰ Sekungoramba kwaVakaita izvozvo, Vanoramba masangano. Havarambi kurongeka, asi sangano. Kurongeka, tinofanira kuva nako. Asi sangano hatifaniri kuva naro, nekuti rinotara miganhu: "Tiri Zvakati-zvikati." Uri Mukristu here? "Ndiri muMethodisti." Uri Mukristu here? "Ndiri muBaptisti." Zvakangofanana nekuti nguruve iri mudanga. Izvozvo hazvinei nechekuita naZvo, kwete zvachose. Mukristu!

⁴¹ Ndakabvunza mumwe musikana humwe husiku, papuratifomu, "Uri Mukristu here?"

Akati, "Nhai, ndinokupai kunzwisia kuti, ndinopfutidza kenduru husiku hwoga-hwoga." Sekunge izvozvo zvaiva nechekuita neChikristu!

⁴² Mumwe murume akati, "Nhai, ndiri wemuAmerica. Chokwadi!" Saka, hazvinei nechekuita naZvo, kana chii zvacho. Uri Mukristu nekuti uri wehumwe Humambo. Ndizvozvo chaizvo. Uye uri—uri mune humwe Humambo, kumusoro.

⁴³ Zvino, Samueri akaitei? Zvimwe chetezvo zvakaitwa naMwari apa. Samueri akadana Israeri pamwe chete, akati, "Zvino, nditeererei. Ndinoda kukubvunzai chimwe chinhu. Pane here imwe nguva zvayo yandakambokuudzai chero chinhu chakange chisiri chokwadi?" Akati, "Ndi—ndiri muporofita waMwari pakati penyu. Ndiudzei imwe nguva yandakambokuudzai chero chinhu muZita raShe chisina kuitika." Ndizvo zvakataura Samueri kwavari. Akati, "Uye Mwari havana here kukupai zvokudya nekukuriritirai uye vakaita zvinhu zvose izvi?" Akati, "Muri kuita chivi nekuedza kuita semamwe marudzi."

"Oo . . ." vakadaro.

⁴⁴ Akati, "Ndinoda kukubvunzai chimwe chinhuzve. Ndakambokutorerai here chero mari zvayo? Ndakambokukumbirai mupiro here? Kana kuti ndakambokuudzai here chero chinhu muZita raShe chisina kuzoitika?"

Ivo vakati, "Kwete. Hauna kumbotora mari yedu, ichokwadi. Uye hauna kumbotiudza chero chinhu muZita raShe chisina kuitika."

Akati, "Zvino ndinzwei! Muri kuita chivi nekuedza kuita sevamwe vose." Asi vaida mambo zvakadaro! Zvisinei nokuti zvaiva zvakanaka kana kuti zvakaipa, ivo—ivo vaida kuramba vachiita pfungwa yavo.

⁴⁵ Ndicho chinhu chimwe chete chakaitwa nechechi ipo pano paEfeso, vakatora dzidziso yechiNikoraiti. Uye pavakadaro, yakavasundira mukati chaimo mokushandura chihedheni neChikristu pamwe chete ndokukonzeresa makore

chiuru nemazana mashanu emaZera eRima. Zvino Luther paakavadhonzeru kunze, ndokunge (panguva yechipiri) maLutherani vasina kuita chinhu chimwe chete chavakaita kumashure muEfeso! Ndizvo chaizvo.

⁴⁶ Zvino, kana mukacherechedza, zvigadziko zvemwenje zvaive zvisina kunyatsogara saizvozvo. Zvakatanga zvichidzika nenzira *iyi* ndokukwidza. Saka, chakakwiririsa chacho chiri kure nepaAiva akamira chaiva ichi kumusoro *kuno*. Zvino Chikristu zvishoma nezvishoma chakadzima chichibva apo paAiva akamira muchimiro chemuchinjikwa, sezwataiMuona muchitsauko 4; muchimiro chemuchinjikwa *seizvi*. Uye *urwu* ndirwo ruoko rwaKe rwerudyi, *urwo* rwaive ruoko rwaKe rweruboshwe. Zvino, *apa* chaipo, Aiva neruoko rwaKe pachechi *iyi* uye nepachechi *iyo*. Aiva zvose Arfa naOmega uye, ndizvozvo, ose aive pakati pemaviri, mamwe mavara ose. Asi Akataura zvakananga kuti, “Arfa naOmega.” Aiva nemuraraungu pamusoro pemusoro waKe, yaiva sungano yaKe.

⁴⁷ Zvino, kana mukacherechedza, chiedza chePentekosti, pachakatangira, chakadzima zvishoma nezvishoma. Varume ava, Irenaeus, Polycarp, vamwe vose vakasimbisa chapupu chavo neropa ravo, kusvikira zvakamanikidzira Chikristu mumazuva erima rakanyanya.

⁴⁸ Zvino tarisai, zera rekutanga rimwe divi remutunduru uyu mukuru, kwaiuyako Chiedza chishoma-shoma, Chiedza ndokuwedzera, zvadaro Chiedza ndokuwedzerazve. Onai matangiro aChinoita kupenya zvakare, chichiuya kuzuva iroro. Uye zvino pamagumo ezera *iri*, zvakafanotaurwa pano apa kuti raizosvika pane *Raodhikia*, “rinodziya.” Zvino, hezvinoi izvi. Sei, kana chinhu *ichi* pano chakavaunza kune *izvi*, sei tichida izvozvo zasi kuno muPentekosti?

⁴⁹ Uye munoziva kuti Bhaibheri rakati, “Kwaizova nechikara.” Uye tinoziva kuti ndihwo hupapa hwechiRoma. Ndizvozvo chaizvo. Uyezve vaizoumba mufananidzo wechikara ichocco. Mufananidzo chii? Chimwe chinhu chakagadzirwa saicho. Uye ndiwo mubatanidzwa wemachechi, uye Pentekosti iri mauri. Ichasvika nguva apo uchava wesangano kana kuti haukwanisi kuramba wakavhura suwo rako. Zvino onai kana izvozvo zvisiri chokwadi! Ndicho chikonzero tichizvirova chaizvo zvakasimba. Hongu, changamire. Haukwanisi... Zvakaderera pane izvozvo, vachaedza kukubaya-baya zvakaipa, kusvikira vaedza ku... havakubvumidzei kutenga kana kutengesa kunze kwekunge uine munembo iwoyo wesangano pauri. Unozviita kuti zvinyatsoitwa.

⁵⁰ Chaizvo sezvakangoita zuva riya, vakavapisa, ivo... ndakamira imomo munhandare yacho; ndokuchema sekacheche pandaitarisa kumusoro ikoko uko varwi vaigara munhandare iyoyo yakare ikoko. Uye—uye nekuona zvinhu izvozvo, nekuziva

kuti vazhinji vehama dzangu Makristu vakadyiwa neshumba ne—nekubvamburwa kuita zvimedu munhandare imomo, uye vakadzi nevana vadiki nezvinhu. Uye ndinofunga, kana vose vakafira mukutenda, ndaizovaregerera zvino here? Kwete, changamire, hama! Mwari, regai ndimiririre Kutenda kwakambopihwa kuvatsvene! Chinhu chimwe chetecho, zvisinei kuti hachifarirwe sei . . .

⁵¹ Mumwe munhu anogara achida kuti, “Saka, . . .” Mumwe munhu akataura kasiri kare . . . Oo! Vashumiri vakuru vangani vari mumunda wekuvhangera vakandifonera uye vakati, “Hama Branham, kana mukasamisa izvozvo, sangano rose richapesana nemi.”

⁵² “Nhai,” ndakati, “kune Mumwe asingazodaro, ndeUyo ari Kudenga. Ndiye Wacho wandiri kutarisira.” Maona? Zvino, ndinoda vanhu vari musangano rega-rega. Chokwadi. Asi ndakambokuudzai here chero chinhu icho Ishe . . . muZita raShe, chisina kuitika? Maona? Zvese zvakataurwa ko hazvina kuitwa zvakakanaka here? Ndakambokukumbirai mari here? Saka garirai kure nemasangano! Garai makasununguka muna Kristu, regai Mweya Mutsvene nguva dzose upinde nekubuda muchechi.

⁵³ Chinhu choga chine basa, bvisai kusawirirana kwese uku kudiki pamuri. Tuzvitevedzwa tudiki, uye netumanzwiro tudiki twusinganzwisisike twuri pamuri kuhama, nezvinhu zvakadaro, zvizunzirei kure! Usatendera mudzi wenduru uchimbofa wakapinda mumweya wako. Kana ukadaro, uchakukuvadza. Ndizvozvo. Chengeta rudo! Handina basa kuti vanhu vanokuvenga zvakadini, iwe vade zvakadaro. Kana usingagoni kudaro, unoda . . . iyo . . . iwe usina . . . hausati waiswa chisimbiso, une nzvimbo yakaregedzeka nazvino. Saka huya, dzoka, uye uite kuti zvisimbiswe zvakakanaka chaizvo neRopa raKristu. Richakuchenesa kubva pamudzi wose wenduru. Hongu.

⁵⁴ Zvino, munoono, asi tiri kuedza zvakare. Ropafadzo rePentekosti rakadonha kuma 1906, neche panguva iyoyo. Pane mushumiri akagara nesu manheru ano, mumishinari anobva kuTibet, mumwe wevakana—. . . handizvitauri nekuti ari pano; ndinovimba kuti haana kuenda kumba. Ndinofunga kuti achiri pano, anga ari kuzotaura kватiri zvishoma ndisati ndadzika kuno. Uye murume iyeye anorangarira Pentekosti yepakutanga. Paiva pasina sangano, vanhu vose vaive nezvinhu zvose pamwe chete. Oo, zviri nyore sei kutora nhanho isiriyo ipapo chaipo, uye kuti zvinoratidzika zvakakanaka sei kune venjere.

⁵⁵ Tarisai, Israeri haina kuziva kuti pavakanga vakamira kunze uko pamahombekombe, vachidanidzira . . . Zvino, unoti, “Mhando iyi yechinamato ndechimwe chinhu chitsva.” Handiti, ndicho chekaresa chiripo. Chokwadi. Kunyangwe nyika isati yambovambwa, vaidanidzira nekurumbidza Mwari. Mwari

vakataura kudaro, vakabvunza Jobho, "Aivepi apo—apo nyamatsatsi dzamangwanani dzaiimba pamwe chete, uye vanakomana vaMwari vaidanidzira nemufaro." Paiva apo nyika isati yambosikwa.

⁵⁶ Asi zvino tarisai Israeri, yaiva yaona minana. Ndiyo yaive Pentekosti yekutanga; Israeri, Pentekosti yezuva iroro. Zvino vakanga vaburitswa kubva muEgipita, Mwari vakange vavaropafadza, vakavapa mhando dzose dzeviratidzo nezvishamiso, uye ndokuvadzikingura. Uye pavakamira pamahombekombe iwayo uye vakava nemusangano wePentekosti...Vakadaro! Zvino teerera. Mosesi akaimba muMweya, uye Miriami akatora tamborini ndokumhanya achidzika nemahombekombe, achiridza tamborini iyi, achitamba muMweya; uye vanasikana veIsraeri vakamutevera, vachitamba muMweya. Kana usiri musangano wePentekosti, handisati ndamboona mumwe. Havana kana kutenda kuti nyika ye—yechipikirwa yaiva makore makumi mana kumberi kwavo. Aiva mamaira anenge makumi mana chete. Asi zvaizovatorera makore makumi mana kusvika mamaira makumi mana nekuti vakasarudza chinhu chisicho. Vakasarudza kuva nemurairo pachinzvimbo chekutendera Mweya Mutsvene kuti uvatungamirire, Shongwe yeMoto ivatore nzira yose nekuvatungamirira. Vaida kuva nechimwe chinhu chekuita pachavo; vaida kuva nevamwe vaprisita, nevamwe vanoremekedzwa, nedzidzo yebhaibheri diki yavaigona kukakavadzana pairi, panzvimbo pekungopfuirira mberi uye vorega Mweya Mutsvene uvatungamirire. Vaiva muMweya; Mwari vakange vapa zvinhu zvose, asi vaifanirwa kuva nechimwe chinhu chekuita maZviri.

⁵⁷ Zvakangofanana nekuita masanganiswa zvakare. Siya mombe yakadaro. Siya bhiza rakadaro. Siya chikafu chakadaro. Ivo... Sainzi yakataura, muReader's Digest, chinyorwa chazvo, kana vakaramba vachigadzira chikafu chemasanganiswa, uye vanhu vochidya...Sehuku, vane huku iyoyo inonzwisa tsitsi kusvikira haichina mapapiro kana makumbo. Uye kana ikakandira, inokandira kusvika yafa, inogona kurarama kwegore chete. Uye nyama yacho yakapfava kwazvo zvekuti haugone kuidya. Uye vanhu vachiidya, iri kutsveyamisa vanhu. Ndizvozvo chaizvo.

⁵⁸ Munoziva, ngochani dziri kuwedzera zvingangoita makumi mana kubva muzana muUnited States, mugore rakapfuura. Uye munoziva here kuti sainzi inotaura kuti madzimai ave kuwedzera kufara pamapendekete avo uye nokutetepa muhudyu, uye varume vave kutetepa pamapendekete avo uye nokufara muhudyu? Muri kudya mbeu yakatsveyamiswa, muri kudya zvinhu zvakatsveyamiswa. Mutumbi wako wakaitwa kuti udye chinhu chiri sepamasikirwo. Uye zviri kuitei? Zviri kushandura nzira yemasikirwo evarume nevakadzi, kusvikira

Hollywood, kunyangwe hurumende yedu, nezvose zvazara nevakatsveyama. Chii chaari kuita? Vari kuzviunzira pavari nemuti wavo ivo wezivo, vachizviuraya pachavo.

⁵⁹ Dzokerai kumavambo! Siyai zvisikwa zvakadaro. Siyai Mwari vakadaro. Chengetedzai Chechi iri muMweya Mutsvene; uye ibvai pane mabhishopi ose aya navanapapa vane mhando dzose dzedzidziso. Dzokerai kwatakatangira. Dzokerai. Jesu aizouya nhasi manheru ano, waizoti, “Ndiri muMethodisti.”

Aizoti, “Zvakange zvisina kudaro kubva kumavambo!”

“Ndiri muPresbyteriani.”

“Zvakanga zvisina kudaro kubva kumavambo!” Chii chaise pamavambo? Chiitiko chePentekosti cherubhabhatidzo rweMweya Mutsvene. Ndiyo nzira yaYakatanga nayo.

⁶⁰ Asi, munona, takatozvitsveyamisa. Oo, zvinoita yakanakisa. Chokwadi. Chechi iyoyo diki yakamira ipapo ichitamba, nekudanidzira; uye zasi mumugwagwa, nevanhu vachivatema nematombo, vachivaseka, nezvinhu zvose zvakadaro. Izvozvo hazvina kunyatsonaka. “Asi zvino tine Rumbidzo huru, neChitendwa cheVaapostora, uye, oo, Dhokotera Ph.D., L.L. vaviri vana L.D., *Nhingi-nhingi* ndiyemufundisi wedu.” Uye obuda zvino achiti, “Aa-meni,” semhuru ine chiveve, achienderera saizvozvo, mhando yezvinhu zvose izvozvo.

⁶¹ Ruregerero, nda—ndanga ndisingarevi kudaro. Ndiregerereiwo, ndanga ndisingarevi kutaura izvozvo saizvozvo. Maona? Ndanga ndisingarevi kudaro. Hazvina kufanira kumuranda waMwari.

⁶² Asi, tarisai, ivo vose, ini...zvangouya mupfungwa dzangu, munona. Asi anomira otaura zvinhu zvose izvozvo zvakasiyana-siyana saizvozvo, ofanodzidzira asati...munoziva, kuti, “Zvino, kwete, hausi kuzvitaura nenzira chaiyo. ‘Aa-meni.’” Ndinofarira musangano wakanaka, wekare wePentekosti uko simba raMwari riri kudonha, uye muri kungodanidzira nekushevedzera nekurumbidza Mwari, muchiva nenguva yakanaka. Ndiyo nzira iyo; Mweya wabata vanhu. Asi isu...Hauchagoni kunzwa “Ameni!” zvachose, yave “Aameni.” Zvisinei, ndiko kwatinosvika, munona. Masangano aya akaomarara, kuzvikudza...

⁶³ Zvino ko vaapo...Paiva nechiporofita here maererano naizvozvo? Munorangarira here chiporofita chaPauro manheru apfuura? “Ndinoziva kuti mushure mekuenda kwangu, mhumhi dzinoparadza dzichapinda pakati penyu, uye varume veboka renyu, yenyu...muchechi menyu chaimo (iyo cheChechi yeRoma Katorike, ichiuya) vachasimuka pakati penyu vokwevera vadzidzi kwavari.” Uye mhumhi dzaPauro, tinoona kuti, dzakazova vaNikoraiti.

⁶⁴ Teererai Mweya uchitaura kubudikidza nemuporofita zvakare, “Mumazuva ekupedzisira nguva dzenjodzi dzichauya, nekuti vanhu vachange vachizvida pachavo, (‘Ndini Chiremba *Nhingi-nhingi*, usandiudze nezvaZvo, zvino. Ndinokupa kunzwisia kuti ndiri muPresbyterian. Hareruya!’ Kana kuti, ‘Ndiri muPentekosti.’).” Zvine mutsauko wei, kana usiri muPentekosti pahunhu hwako? Chiitiko chayo, munoona. Hongu, changamire. “Ndiri weAssemblies.” “Ndiri weChurch of God.” Saka izvozvo... zvine mutsauko wei wazvinoita kuna Mwari? Unofanira kuva weHumambo huri kumusoro uko, munoona. Ndizvozvo chaizvo.

⁶⁵ Zvino, kana—kana ukaona, izvo...zvinhu zvose izvi kunongova kuungana kwe—kwemafaro. Zvino, Wakati, “Vaizova nemisoro mikukutu, vanoda zvepamusoro, vanoda mafaro kupfuura kuda kwavanoita Mwari.” Oo, havagoni kuenda kuchechi neSvondo manheru chero bedzi paine chimwe chirongwa chakanaka chiri paterevhizheni. Oo, Ini zvangu! Nguva dzose ivo... Kunyangwe machechi ane matimu ebbora, nesvusvuro dzemuto, nemapati ekiriketi, uye, “neavo vanoda mafaro kupfuura kuda kwavanoita Mwari, vanotyora sungano, vapomeri venhema, vasingazvidzori, uye vazvidzi veavo vakanaka.” *Ava vachizvidza avo*, munoona. *Ava vachizvidza avo*, vachivabuditsa kunze. Vazvidzi veavo *vanova* vakanaka.

⁶⁶ Oo, munoti, “MaCommunisti, hama.” Oo, kwete. Kwete, kwete.

⁶⁷ “Vakaoma misoro, vanoda zvepamusoro, vanoda mafaro kupfuura kuda kwavanoita Mwari, vanotyora sungano, vapomeri venhema, vasingazvidzori, vazvidzi veavo *vanova* vakanaka, vaine *chimiro*...” Chiitiko chemasangano, munoona. “Vane chimiro chehumwari, asi vachiramba Simba racho.”

⁶⁸ Ko ungave chii muzuva rino? Munoonaa, “Vane chimiro chehumwari.” Woenda kuchechi wakangozvirerekwa sekukwanisa kwaungagona, neSvondo, zvino wopfeka zvikabudura Svondo masikati, wocheka huswa pachivanze wobuditsa doro reOertel’s 92 kunze. Uye mufundisi obuda kunze onoputa mudzanga uye odzoka, munoziva. “Vaine chimiro chehumwari!”

⁶⁹ “Saka, mufundisi, vane chechi kumusoro uko, vanondiudza kuti mumwe mudzimai akapodzwa rimwe zuva kubva kuken...”

“Hmm. Hmm. Hazvina maturo! Mazuva ezhishamiso akapfuura.”

⁷⁰ “Nhai, munombozivei? Nda—nda—ndaive kumusoro kukachechi kadiki humwe husiku, kamisheni kadiki zasi pakona, zvino paiva nemumwe munhu aisimuka kumusoro ikoko, achitaura chimwe chinhu, kuwa-...”

“Oo, mudiwa, usambofe zvako wakaenda pedyo nezvakadaro. Zvimbwa mupengo. Ini zvangu! Usatambire pedyo navo. Vaumburuki vatsvene. Usambofa zvako . . .”

⁷¹ “Vane chimiro chehumwari asi vachiramba simba racho, furatira kune vakadaro. Nokuti ndivo vaya vanoenda mudzimba nemudzimba vachitungamirira vakadzi mapenzi vakatapwa nokuchiva kuzhinji, vasingafe vakakwanisa kudzidza kana kutombouya kuzivo yeZvokwadi.” Ndizvozvo chaizvo. Hezvoka izvo, kirabhu yemadzimai anobatsira, kirabhu *iyi, iyo*. Chechi inonzwisa urombo ine nzanga zhinji zvekuti haichatombokwanise kuparidza Vhangeri zvachose. Mufundisi anokwanisa kuwana maminitsi makumi maviri chete, uye anofanira kutaura pamusoro pechimwewo chinhu zvino. Maona? Kana vakasadaro, bhodhi remadhikoni rinosangana naye. Hongu, changamire.

⁷² Oo, hama, ko mufundisi akanaka anofanira kuitei nhasi? Kungoita zvakanakisa zvaanogona kuti amire nekugura mapazi pavanoda, uye orega zvimedu zvichingowira chero kwazvada; zvino woripotsera kunze ikoko. Ndizvo zvoga. Hongu, changamire. Ndizvozvo chaizvo. Usa—usarega chero ani zvake, chingoparidza Shoko uye wonyatsogara naRo, chingoramba uchirovedzera. Kana vakakukandira mujeri, Riparidze mujeri. Kana ukaiswa chero kipi zvako, paridza kwese kwaunoenda; chingoramba uchienda, uchiparidza. Ndizvozvo chaizvo. Zvino, ndizvo zvakaitika. Munoona, vari kurimanikidzira kunze.

⁷³ Zvino tave kuuya ku—kuZera reSmirna. Ndima 8:

. . . Kumutumwa *wekereke iri paSmirna* nyora;
Zvinhu izvi ndizvo zvinotaura iye *wokutanga nowekupedzisira*, wakanga akafa, uye mupenuy;

⁷⁴ Ndinoda kuti mucherechedze nguva yose yaAnoZvizivisa kuzera rechechi, Anoisa chimwe chinhu cheHumwari hwaKe. Ndicho chinhu chekutanga chaAноedza kuzivisa kuchechi, kuti, ndihwo Humwari hwaKe. Ndiye Mwari! Munoona here nyaya huru kumashure kuno iyo Irenaeus nevamwe yavaikakavadzana pamusoro payo? Vakaedza kutaura kuti Mwari mumatenga matatu, uye ndiMwari vari muvanhu vatatu, uye Mwari mune *izvi*. Akati, “Hakuna chinhu chakadaro! Madunhurirwa eMunhu mumwe chete, uye ndiMwari Samasimba.” Ndizvozvo chaizvo. Saka haudaro . . . vagara vainazvo. Uye Mwari pano pamavambo vari kuZvizivisa nezve humwe weHumwari hwaVo—hwaVo. Munoona vari kuZvizivisa, kutanga pano apa, “Ndini Iye aivapo, aripo, uye achauya. Uye ndiNi Samasimba.” Pano Anotanga pakarepo neZera reSmirna zvino.

⁷⁵ Zvino Muteererei, “Ini . . .”

. . . kumutumwa *wekereke iri paSmirna* (Uye tinotenda kuti iyeye ndiIrenaeus.) nyora; Zvinhu izvi ndizvo zvinotaura iye *wokutanga nowekupedzisira*, . . .

Maona? Akazvizivisa pachaKe, “Ndini Mwari, zvino, wezera rino rechechi. Handidi vanamwari vana kana vashanu vakasiyana pano. Ndi—Ndini Mwari. Munoono, ndizvo chaizvo.”

... *wakanga* akafa, uye mupenyu; (Ameni!)

⁷⁶ Zvino, ndiyo zi—ziviso. Zvino—zvino *Smirna* zvinoreva kuti “nduru,” uye inobva pashoko rekuti mura—mura. Uye che—chechi yekutanga—chechi yekutanga, zvino...vakange varasikirwa nerudo rwavo rwepakutanga, chechi yeEfeso. Uye chechi iyi yakanga yotanga kuva “nemudzi wenduru” uchisimuka mavari nekuda kwekuti chechi iyi, chechi huru, chikamu chikuru (vazhinji vavo, nguva dzose) vaitaura vachirwisa Mweya Mutsvene kuti utonge muchechi, uye vaida kuzvitonga, pachavo. Vaida kuisa huprisita, vaida kuita sezvakaitwa nevanhu vemuTestamende Yekare. Vaida vaprisita. Uye ivo...Kana vanamwari vechihedheni, kumashure ikoko, kwavakatendeutswa, vaiva nevaprisita nevamwe vakadaro vari va...vaJupiter, nevaprisita vaVenus, nevamwe vakadaro; ivo—ivo—vanoda kuunza zvinhu zvimwe chetezvo zviite varume *ava*. Munoono, chinhu chacho chose chihedheni pakutanga kwacho. Mahedheni ose aiva nevaprisita ivavo nezvinhu zvakadaro. Asi—asi Chechi yaMwari mupenyu, haizvitive kwavari. Kristu ndiye Muprisita wedu, Muprisita wedu Mukuru. Tine Muprisita Mukuru, tafura zvakare yatinodyira pairi.

⁷⁷ Zvino, chechi iyi yakanga yatanga kusimudza “mudzi wenduru.” Sei? Yaiva nenduru kune avo vaida kupfuirira mberi neMweya Mutsvene. Rudo rwakanga rwapera, uye vaiedza kurwuchinjanisa nezvitendwa nemasangano, vachibva pahutungamiri hweMweya Mutsvene. Pafungei! Ndosaka ndu—ndu—nduru yaiva mavari. Zvakanaka.

⁷⁸ Zvino, chechi yekutanga, iyi...nduru yakatanga kupinda zvishoma nezvishoma. Chechi yechipiri, yakati wedzerwei zvishoma. Uye, pakupedzisira, yakaverevedza ichipinda mukati chaimo nekuti vaive “vachigadzira chechi iri nani”; vaifunga kuti vaidaro. Pano chaipo vaiva nechimwe chinhu chine mutsigo, vanhu vakuru vechiRoma vaigona kupinda. Sei? Vaiva napapa, vaiva—vaiva nevarume vakuru, makadhinari, nevamwe vakadaro. Vaipfeka zvakanaka. Vakabva paruzha rwese nezvinhu zvavaive nazvo; vakanyarara kwazvo. Zvakaratidza kuti vaive vari kufa. Uh-huh. Uh-huh. Vaive vari kufa. Uye saka vakava vakatsiga uye vakaita bato riri nani. Chinhu chekutanga kumusoro kuno, vakava nechinhu chose chiru musangano rechinamato, chechi yePasi rose yeRoma, Chechi yeRoma Katorike muZera reRima. Saka, zvino, vaive nevaremekedzwa, uye vaiva neboka repamusoro.

⁷⁹ Oo, zvaive zvakanakisa kupfuura apo pavaisimbomira kunze pamugwagwa, “uye vachifanira kufamba vari mumatehwe emakwai sematehwe embudzi, nekuva varitairi, nekuchekwa

nemasaha, uye—uye nekusekwa, nekuitwa jee navo,” uye saPauro akataura muna VaHebheru chitsauko 11.

⁸⁰ Handiti, chechi iyi huru, kwazvo, inopfeka zvishongo zvakanaka, zvine hanzu dzemukati, ne—nezvimwe zvinhu zvese izvi zvavanopfeka zvakadaro. Chokwadi, zvaitaridzika kuva zvine mutsigo, “Baba, Mufundisi, Chiremba, Baba *Nhingi-nhingi*.” Oo, ini zvangu! Vaigona kuita kumwe “kunanisira,” chaiko ipapo.

⁸¹ Asi, munoonaa, chaiva chinhu chemasanganiswa. Masanganiswa! Munoonaa, chaiva chisina chero Hupenyu machiri. Uye havachagoni kudzokera zvakare, ndicho chikonzero vasingambomuke. Rumutsiriro rwaLuther harwuna kumbomuka zvakare. Rumutsiriro rwaWesley harwuna kumbomuka zvakare. Rumutsiriro rweNazarene harwuna kumuka zvakare. Kunyangwe rwePentekosti harwusi kuzomuka zvakare. Sei? Nekuti makarwuuraya. Makarwusanganisa nenyika, nepfungwa yechiNikoraiti, kusatendera Mweya Mutsvene kuti utore mukana waWo. Ndizvozvo chaizvo. Makaita chechi yemasanganiswa, uye haikwanisi kuzvibereka zvakare. Pamunoberekazve, munowana mamwe Methodisti; maBaptisti akaberekazve, anowana mamwezve maBaptisti; Makatorike anoberekazve, owana mamwezve maKatorike; munowana chinhu chimwe chete chamuri kubvisa pachikwande. Asi regai ndikuudzei chimwe chinhu; kana Mweya Mutsvene wadzoka, Unounza kuberekwa *patsva* neHupenyu *hutsva*; kutendeuka. Rubhabhatidzo rweMweya; rwunounza Chechi kuti idzokere pakuvu sezvairi zvakare, woisa Hupenyu zvakare mairi.

⁸² Chibage chemasanganiswa hachina hupenyu machiri. Hupenyu hwachinahwo, hwave kutopera. Zvino, tinowana izvozvo muZera iroro reRima ikoko, “Zvishoma zvaunazvo, batirira pazviri,” Akadaro. Vakanga hwose vahumanikidzira kunze. Zvino, asi hauzozvibereki zvakare. Zvino, izvo . . .

⁸³ Asi Mutumbi waJesu Kristu hausi—hausi sangano. Mutumbi waJesu Kristu Mutumbi wakavanzika, Mutumbi we... muHumambo hunova Humambo hwepamweya hwakaiswa panyika naJesu Kristu ari Mambo weHumambo uhu, Muprisita Mukuru kuti apirise zvipiriso zvevafambi muHumambo uhu. Iye Muporofita (Shoko) anoparidza Zvokwadi nekuunza Chiedza chaMwari muHumambo uhu; uye Ndiye zvose Muporofita, MuPrisita, naMambo, muHumanbo uhu. Zvino tinopinda muHumambo uhwu sei? nesangano? netsamba? nekukwaziswa ruoko? Asi “neMweya mumwe tose takabhabhatidza muMutumbi Mumwe” unova Mutumbi wakavanzika waJesu Kristu, uye takabhabhatidza imomo, kwete nemvura, kwete nekusaswa, kwete nekudirwa, kwete nechero mhando yerubhabhatidzo rwemumvura, asi “neMweya mumwe, Mweya Mutsvene, tose takabhabhatidza muMutumbi mumwe,” VaKorinde Vekutanga 12. Hongu, tinobhabhatidza

muMutumbi uyu neMweya mumwe chete, Mweya Mutsvene, zvadaro hatisi wechero chinhu zvacho asi Kristu. Uri waKristu. Humambo hwakavanzika hwaMwari hwakagadzwa, watinopinda maHuri nerubhabhatidzo rweMweya Mutsvene. Ndinozvida Izvozvo! Hmm!

Kune vanhu potse kwese-kwese,
 Vane moyo yavo yose iri kubvira
 NeMoto wakawira paPentekosti,
 Wakavashamba nokuvachenesa;
 Oo, Uri kubvira zvino mukati memoyo wangu,
 Oo, kubwinya kuZita raKe!
 Ndinofara zvikuru nokuti ndinogona kuti ndiri
 mumwe wavo.

Ndiri mumwe wavo, ndiri mumwe wavo,
 Ndinofara zvikuru nokuti ndinogona kuti ndiri
 mumwe wavo; (Hareruya!)
 Mumwe wavo, ndiri mumwe wavo,
 Zvino ndinofara zvikuru nokuti ndinogona
 kuti ndiri mumwe wavo.

Kunyangwe vanhu ava vangasadzidza kuva,
 (D.D.D. Ph.D. Munoono.) . . . vangave vasina
 kudzidza,
 Kana kuganza nemukurumbira wenyika,
 Vose vakagamuchira Pentekosti yavo,
 Vakabhabhatidza muZita raJesu;
 Uye vari kutaurira zvino, kwese kure
 nekwakapararira,
 Simba raKe richiri rimwe chete,
 Ndinofara zvikuru nokuti ndinogona kuti ndiri
 mumwe wavo.

Hamufari here? Hongu, changamire. Kungova mumwe wavo. Ndizvo zvoga.

⁸⁴ Ndinarangarira ndichifamba zasi nemuMemphis, mudzimai mudiki uya, wekare wechitema aine musoro wake wakarerekera ipapo. Akati, "Mangwanani, mufundisi."

Ndakati, "Ko maziva sei kuti ndanga ndiri mufundisi?"

Akati, "Ishe vandiudza, 'Mufundisi waVo ari kuuya achidzika nemugwagwa, akapfeka ngowani yetani, akatakura sutukesi.'" Akati, "Ndaziva kuti manga muri iye pandakuonai muchiuya." Maona? Oo, akanga ari mumwe wavo. Ndizvozvo chaizvo! Oo, Mwari vakanaka sei!

⁸⁵ Zvino ndinotenda chimwe chinhu...[Hama Branham vanoverenga chinyorwa chavapihwa—Mupepeti] "Musikana mudiki wamaka—makanamatira, Svondo husiku, anobva kuBedford, ari kufanirwa kunge atofa. Izvi hazvigoni... Ndapotia isai munamato." Musikana mudiki uyo isu...

vakamunamatira pano Svondo manheru pano, weku Bedford, “acha—achangobva kufa,” vadaro. Ngatiisei munamato:

⁸⁶ Ishe Jesu, ndinonamata kuti neimwe nzira, nemamwe maitiro, Ishe, itai kuti minamato yedu isvike kuitira mwana iyeye. Tinokumikidza chinhu chiduku ichocco kwaMuri, Baba vedu Mwari. Uye tinofunga nezvezantu ivavo vaive pano uye vachinamata uye vachikumbira munamato wemusikana muduku iyeye. O Mwari Baba, ndinokumbira kuti—kuti nhau iyi ngairege kuva yakadaro, Baba; hatizivi, asi ndinomata kuti Muchava netsitsi nekupa simba uye moita kuti chinhu chiduku chimutswe uye ararame kuitira mbiri yaMwari. NemuZita rajeSua Kristu tazvikumbira. Ameni. Ishe dai vawedzera maropafadzo aVo.

⁸⁷ Zvino, chechi. Zvino, zita rechechi rinobatanidza nemhando yehunhu hwayo. Macherechedza here *Smirna* zvichireva kuti “nduru”? Uye munocherechedza here imwe neimwe yechechi zvino, izita rechechi rine chimwe chinhu chekuita nehunhu hwechechi yacho. Ndaigona kutaura chimwe chinhu pano; asi zviri nani ndirege, nekuti mungatadza kundinzvisisa. Maona?

⁸⁸ Zita rako rinodarowo, zvakare. Unogona kusazviziva, asi rinodaro. Oo, hongu. Unoti zvino, “Ndezve vanoshandisa manhamba.” Kwete, hazvisi. Jakobho paakaberekwa vakamudana kuti Jakobho aiva “munyaengeri;” asi paakaita mutsimba neNgirozi, Mwari vakashandura zita rake kuva *Israeri*, “muchinda.” Ndizvo here? Sauro aiva “Sauro weTarlo,” muchinda akaipa moyo; asi, paakauya kuna Jesu, akanzi “Pauro.” Zita raSimoni rainzi “Simoni”; asi paakauya kuna Jesu, akanzi Petro, “dombo diki.” Oo, hongu, changamire. Iro... Zita rako rinozivisa zvauri... Rine zvarinoratidza pahunhu hwako.

⁸⁹ Uye chechi iyi yainzi *Smirna* nekuti yaifa. *Smirna* zvinoreva “nduru.” Nemamwe mashoko, mudzi wenduru waisimuka uye wayiidzipa, yaive munzira yayo kune mura. Ndiyo yavanzodza nayo mitumbi, mura, munooна. Yaiva mura, zvinonhuwira, semafuta ekuzora. Mura inoshandiswa ku—kuzodza zvitunha mushure mekuisa mishonga mairi, nezvimwe zvakadaro. Inobatanidza nerufu, uye chechi yaifa.

⁹⁰ Uye, oo, hamusi kukwanisa kuona here, nhasi, shamwari, kufamba kukuru kwePentekosti kwaiva neHupenyu makore mashoma akapfuura, hamusi kuona here kuti kuri kuzodzwa zvino nemura? Maona? Mafuta okuzodza mamwe chete aiva muchechi iyi *pano* auya zasi chaiko uye achizodza iyi zasi *kuno*; iri kufa nekuti vari kudzokera kumamvemve echinamato, uye vachibvisa hanzu dzavo chena, vatsvene. Vanhu vadiki vakamira kunze uko, vaine Mweya Mutsvene wechokwadi, vakataura nendimi, nekuratidza Mwari. Zvino, hama, vaive vakatendeka uye, “vari vechokwadi.” Ivo—vaive vechokwadi

zvamazvirokwazvo, waigona kuvimba navo chero kipi zvako. Iye zvino hauzivi chekuvimba nacho kana wekuvimba naye. Maona? Pane chimwe chinhu chakaitika. Chimwe chinhu chakaitika. Chii? Vari kuzodzwa nemura, yenduru. Ichisimuka. Mumwe...

⁹¹ Chii chakanga chazvikonzeresa? Mumwe akapinda, paiva neche—chechi yainzi, yekutanga, yaiva Kanzuru Huru. Zvino ndokuidana kuti Assemblies of God. Kubva muAssemblies of God kwakauya Church of God. Kubva muChurch of God, zvino vakatanga kutarisa mhire, voti, "Uri Assemblies." Mumwe woti, "Uri Church of God." Zvino kubva imomo makabuda United Pentecostal Church of God, nekuda kweimwe nyaya. Uyezve, chinhu chekutanga munoziva, pachinzvimbo chekugamuchira Chiedza nekufamba maChiri, nhai, vakazviita sangano kusvikira vaisagona kugamuchira Chiedza.

⁹² Zvino, apo ru—rubhabhatidzo muZita ra "Jesu Kristu" parwakaunzwa pachinzvimbo cha "Baba, Mwanakomana, neMweya Mutsvene" kune Assemblies of God, vakange vatomira zvakasimba kare saka vaisakwanisa kuzvishandura. Uye vanoziva kuti IChokwadi! Ndinopikisa chero ani wavo kuti aratidze kuti haZvisizvo neBhaibheri. IChokwadi chemazvirokwazvo. Asi vangaitei? Havakwanise kuzviita. Munoona, vangazotyora chitendwa chavo, havakwanisi.

⁹³ Zvino veOneness vakaitei? Pachinzvimbo chekuZvigamuchira nekupfuirira mberi, vakaomarara: "Mwari varumbidzwe nekusingaperi! Tine Chiedza, uye imi hamuna. Tiri ve..." Vakaitei? Vakaiita sangano. Haukwanisi kuita Mwari sangano. Mwari havatomborina kana chimiro, Bhaibheri rakadaro. Kwete, hapana zvetsika pana Mwari.

⁹⁴ Zvino, ndokubva veAssemblies vaedza kuVaita sangano uye nekuvaita...yavo...yavo Chechi ye—ye—yemazvirokwazvo. Uye ndokubva Oneness yauyawo, ikaedza yayo kuita sangano, uye ivo "vaiva neChiedza chakawedzerwa." Saka vakaitei? Vakachidzima nekuda kwenzira yavo yehundini, ine nduru yavakazviita nayo. Pachinzvimbo chekuchipa nemunu nekutapira, vakaedza kudzinga mukuwadzana mumwe wacho, vorega kuva nechekuita naye. Uye ndizvo zvakazviita. Zvakanga zvaramba zvichipfuirira mberi, zvino. Chinhu chekutanga munoziva, ndokubva kwauya imwe zvakare, vakatora izvi, uye zvino vakapatsanurana. Mumwe akati, "Ari kuuya ari pabhiza jena." Mumwewo oti, "Ari kuuya ari pagore jena. Mwari ngavarumbidzwe, ndichazvitangira sangano neche kuno." Munoona nzira yavakaita? Zvakaparatzira mura—mura. Yakaitei? Yakavhara hukama hwehama.

⁹⁵ Vakawanda vakadzi, varume, manheru ano, muAssemblies of God, vanoda kuuya uye vobhabhatidzwu muZita rajesu

Kristu, vachiziva kuti IZvokwadi yaMwari. Vaizodzingwa kana vakazviita.

⁹⁶ Uye maOneness akawanda ve... Zvino, handisi Oneness. Handitendi “muhumwe” nenzira yavanoita. Handitendi muna *Jesu* sezvavanotaura, “*Jesu*”; kuna vana*Jesu* vakawanda. Ndi*Ishe Jesu Kristu*. Ndizvozvo chaizvo. Zvino, uye handi... ndinozvitenda izvozvo zvakasiyana nezvavanoita. Vanobhabhatidza mu*Zita raje*su, mu*Zita raje*su kuti vavandudzwe, kuti “Mukubhabhatidzwa (kuvandudzwa) kunounza Kristu kwauri kuitira rubhabhatidzo rwako nemumvura.” Handitendi izvozvo. Ndinotenda kuvandudzwa kunouya ne*Ropa raje*su Kristu kubudikidza ne*Mweya Mutsvene*. Ndizvozvo chaizvo. Rubhabhatidzo rwungori bedzi chii chekunze kubasa remukati rekuvandudzwa kwakaitwa. Maona? Saka, handibvumirane nazvo. Zvakanaka, asi vose ihama dzangu.

⁹⁷ Pandakatanga semuparidzi weBaptisti, vakauya vachiti, “Hama Branham, imi huyai kuno, isu—isu—isu tinaCho uye takaChitakura kuno uku.”

⁹⁸ Ndakati, “Hapana kana mumwe wenyu, ndinomira pakati chaipo pemapoka maviri ndoti, ‘Tiri hama!’” Handina basa kuti chii, handina basa kana munhu akapikisa, hazvina kana nekadodzi kemutsauko kwandiri, achiri hama yangu.

⁹⁹ Ndine hama inoda payi yemaapurosi; ndinoda cheri kunyanyisa, asi handisi kuzorega kuyanana naye. Iye anogona kudya payi yake yemaapurosi uye ini ndinodya payi yangu yecheri. Uye ndinoisa *zvinotapira zvichena* pamusoro peyangu, kana asingaidi, nhai zvenyu, anogona kuva nayo. Munoziva kuti... Chi ichocco? Zvinhu zvakakonzongwa-konzongwa zvavanoisa pairi, munoziva, “ruomba rwakakonzongwa-konzongwa.” Ndinozvifarira. Ndava kunyanya kuchembera zvino kuti ndizvidye, asi zviri... Asi ini—ini—ini... Ndizvo zvandinofarira. Kana asingaifariri, haasungirwi kuidya. Zvakanaka, ndichadaya yangu. Asi achiri hama yangu! Ndizvozvo chaizvo.

¹⁰⁰ Uye saka ndi—ndinozvifarira, ndinofarira kuyanana. Asi kana tikatara mitsara sekudai, zvino toti, “Kwete, iri isangano *edu*,” uye torega kutambanudza nekukwazisana maoko nemumwe ari parutivi, uye toti, “Mwari ngavarumbidzwe, hama!” Ini zvangu! Ndipo paunokuti kuyanana. Kana ukasadaro, unowana mudzi wenduru iwoyo sekungowana kwakaita vekuSmirna kareko, uye unokonzeresa chinhu chimwe chete. Zvakanaka, saka zita ravo raive “nduru.”

¹⁰¹ VaNikoraiti vakaramba vachivamanikidzira kunze kusvikira maZera eRima. Zera raLuther rakaunza danho rekutanga renyasha, Chiedza chidiki chakatanga kupenya. Ndokuuya mushure macho, kukauya John Wesley

nekucheneswa, chikawedzera kuppenya zvishoma. Ndokuzouya rubhabhatidzo rweMweya Mutsvene nemaPentekosti, vachiunza zvakare kutenda kwemadzibaba. Asi havana kukwanisa kurwuchengeta rwakadaro, naizvozvo vakatozorwuita sangano, zvino ipapo vakatanga kudzokera muchiNikoraiti zvakare. Chaizvoizvo zvakanzi neBhaibheri vaizoita.

¹⁰² Zvino, ndinofanira kutarisa pano kana kuti ndichazviwana...nguva yakawandisa yatorwa. Ngatisvikei kundima 2, kana kuti...inozova iri ndima 8, 9. Zvakanaka, zvino kutambudzwa, ndima 9:

*Ndinoziva mabasa ako, kutambudzika kwako,...
urombo, (asi uri mupfumi)...(Oo, ini zvangu!)...
Ini... (Zvino Ari kutaura kuChechi zvino, Chechi
chaiyo, kwete vamwe; vaivenga mabasa iwayo
evaNikoraiti.) ...Ndinoziva kumhura kwaivo vanoti
tiri maJudha, uye vasiri ivo, asi vari sinagoge raSatani.*

¹⁰³ Zvino, vainyunyuta. Vaive vakarohwa nehurombo. Izvo... Vakange vatora zvose zvavakange vainazvo. Vainge vakavaka chehi yavo diki saizvozvi, uye nekuti vaiva kaboka kadiki-diki kakadaro, vakange vavasundira kunze, chehi huru yakange yadaro, kungovamanikidzira kunze. Uye Rakati, “Ndinoziva. Ndinoziva kuti munofanira kusangana zasi pakona, munosangana mumukoto, kana chero kumwewo kwamunokwanisa.” (Zvino ndakanga ndiri munzvimbo dzepasi uko kwavaifanira kusangana; voenda zasi pasi penyika vonosangana, nezvinhu ikoko.) “Ndinoziva matambudziko ako, uye Ndinoziva madzudzo ako, nezvimwe zvakadaro, asi unoitwa mupfumi nekuda kwematambudziko iwayo.” Oo, ini zvangu! Ndiudzei chero nguva zvayo kutambudzwa pakunouya paChechi, kunoIsimbisa. Nguva dzose kunosimbisa Chechi, mumatambudziko. “Ndinoziva matambudziko ako, asi wakapfuma.” Sei? “Wakabatirira paNdiri; wakapfuma. Asi matambudziko ako haasi kukukuvadza.”

¹⁰⁴ Zvino, izvo... Macherechedza here? VaNikoraiti vakange vazviwanira sinagoge zvino. Bhaibheri rakataura kudaro pano. Mazvicherechedza here pano mundima 9?

Apo...asi...vasiri, asi vari vesinagoge raSatani.

¹⁰⁵ Uh-huh, Chechi yechokwadi yakange yasundirwa kunze. VaNikoraiti vakange vatora hutongi, uye...vakange vasundira kunze vanhu vakange vaine Mweya Mutsvene, saka naizvozvo va—vakange vasina nechekuita navo. Dai Smirna, muAsia, yakaziva chete kuti zvinhu...kuti korona yevaifira chitendero chavo yaizovamirira, vangadai vakadedera. Maona? Zvino, nemamwe mashoko, izvo...chiporofita ichi pachakanyorwa uye chikatumirwa zasi, uye chechi ndokuchibata, uye vakaona kuti ndivo vacho vaizopfeka korona yevanofira chitendero chavo, nhai, vaizo...nhai, zvingadai zvakavavhundutsa kunge

vachafa. Vairwutarisira chero nguva. Harwuna kuuya muzera ravo. Zvino pamwe vamwe vakati, "Saka, munoziva—munoziva, ndinokuudzai, muporofita uya akareva zvisizvo. Johane ainge akanganisa, iye—iye... nekuti hazvina kuitika kwatiri muno muSmirna." Handiti, zvaizofanira kuva mazana emakore anotevera. Maona? Asi kana Mwari vataura chero chinhu, chinofanira kuitika.

¹⁰⁶ Ndipo apo patinonyudza kutenda kwedu, ipapo chaipo paShoko raMwari. Mwari vanochengeta vimbiso yega-yega. Zvisinei... Unogona kufunga kuti zvinofanira kuitika pano chaipo, asi pamwe haisi nguva yaMwari yekuti zviitike. "Asi Shoko raNgu haridzokeri kwaNdiri risina charakabata, asi Richaita izvo zvaRakanzi riite." Mwari vachagara vachiremekedza Shoko raVo, uye munguva yaRo Richakohwa.

¹⁰⁷ Saka vanhu ava vaive ivo, chechi yekutanga, asi muchechi iyoyo maive nehunhu hwaizobuda muchechi yeSmirna pamberi apo. Zvino, zvino vaifanira kuzopfeka korona yevakafira chitendero chavo, vazhinji vavo vaifanira kuuraiwa.

¹⁰⁸ Zvino ngatitorei ndi—ndima 10, tichiverenga izvi:

Usatya chero chezvinhu izvi (sinagogue raSatani) zvauchatambudzika nazvo: tarira, dhiyabhore achaisa... imi mutorongo, kuti tuyedzwe; uye kuti uchatambudzwa kwamazuva ane gumi: uve wakatendeka kusvikira murufu, uye ndichakupa korona youpenyu.

¹⁰⁹ Oo, ini zvangu! Vakaudzwa kuti vasatya pavakadanwa kuti vafire chitendero chavo—chavo. Zvino, Hanzvadzi Wood, chero kipi kwamuri, ndinovimba kuti izvi zvichakubatsirai. Hanzvadzi Wood vaindiudza, rimwe zuva, vakanga vasiri kukwanissa kunzwisia kuti sei vamwe vaigona kudzikinurwa uye vamwe vasingakwanise. Dzimwe nguva unofanira kuziva... Mwari vakaudza vanhu ava, "Zvino, usatyte nezvazvo, nekuti Satani achakuisa mukati imomo, nekuti sangano iri rechiNikoraiti rauya richikusundira mukati, nekuti Ndichakuita kuti ufire chikonzero chaNgu. Asi Ndichakupa korona yeHupenyu nezuva iroro." Saka rega...

¹¹⁰ Zvino tarisai, Akati... Zvino, kana mukacherechedza tichiverenga ndima 10 iyi. Regai ndiiverenge zvakare:

Usatya chimwe chezvinhu izvi zvauchatambudzika nazvo: tarira, dhiyabhore achaisa vamwe venyu mutorongo, kuti tuyedzwe; uye imi muchatambudzika mazuva ane gumi: asi uve wakatendeka kusvikira... (Macherechedza here kuti hazvisi kusvika? Kwete kusvika parufu, asi "kusvikira" murufu. Mazvibata here?) ... uve wakatendeka kusvikira murufu,... (Maona? Uye vakazviita.)

¹¹¹ Zvino Akati, Satani... Macherechedza here uyo Iye—uyo Iye waakati ndiye akanga achizviita? Zvino, *sinagoge raSatani* iri raive “vaNikoraiti.” Tinozviziva izvozvo. Handiro here? Zvino raive sangano, huprisita hwaisimuka hwaizoita kuti vanhu ava vatambudzike, hwaizoita kuti vanhu ava vatambudzike, uye vaifanira kuva vakatendeka kuVhangeri *kusvikira* murufu. Makacherechedza here mumhemberero yemuchato? kwete *kusvika* murufu tinoparadzana, asi “*kusvikira* murufu tinoparadzana.” Maona? Zvino, *kusvika* na *kusvikira* zvakasiyana. Zvino, vaifanira kuve vakatendeka kuna Kristu *kusvikira* murufu. “Kuenda uchidzika zasi chaiko murufu narwo. Usatya, nekuti Ndichakupa korona.”

¹¹² Zvino “mazuva gumi” aya avanotaura nezvawo pano, mazuva gumi. Zuva muBhaibheri ronomiririra gore. Uye *mazuva gumi* aive “makore gumi” ekupedzisira ekutonga kwaD-i-o-c-l-e-a-t-i-o-n uyu, Diocletian. Diocletian. Diocletian, ndiye aiva mambo mukuru uya akatonga mune ekupedzisira... Saka, kune madzimambo akawanda akatonga munguva yeZera reChechi yeEfeso. Uye Nero, ndinotenda, kuti aive iye wacho. Zvino Diocletian pano aiva wekupedzisira akatonga, mumakore gumi ekupedzisira, uye ndiye aiva mutambudzi akanyanyisa kudeura ropa kupfuura vamwe vose. Akangotsigirana pamwe neboka iri zvino va—vakaponda Makristu, ndokuvauraya, vakavapisa, ivo—ivo vakaita zvese, uye aive makore gumi ekutambudzwa kwakaipisia kune ropa rakadeurwa. Zvino nguva yake nekutonga kwake kwaibva pana 302 *kusvikira* 312. Ndipo pakaperera Zera reSmirna, nekupinda kwaConstantine. Zvino akapinda muna 312, Constantine akadaro. Ndiwo akanga ari mazuva gumi ekutambudzwa. Uye zvakatanga naNero zvikapera naDiocletian. Uye zvakatangira muna Nero, kuma A.D. 64 Nero paakatora chigaro.

¹¹³ Zvino, ndima 11 ivimbiso. Zvino tichava neiyi tisati tavhara:

Ane nzeve, *ngaanzwe zvinoreva Mweya* kumakereke;
Anokunda haangakuwadzwi norufu rwechipiri.

¹¹⁴ Zvino, ndinofanira kutaura chimwe chinhu pano, kuitira kuti... Kana ndikachifunga, moyo wangu, uye ndorega kuchitaura, zvino ndiri munyengeri. Maona? Ndinoda kuti mucherechedze chimwe chinhu pano muRugwaro urwu, uye ndinofunga kuti ndicho chimwe chainyanyisa kundivhiringidza kwenguva refu kwazvo *kusvikira* ndazoziva. Zvino ngativerengei izvozvo zvakanyatsonaka, zvino. Maona?

Ane nzeve, (Nemamwe mashoko, “ane nzeve yekunzwa,” munooona, yakazaruka kuMweya.)
ngaanzwe zvinoreva Mweya kumakereke;...

Zvino onai, chinhu chimwe chete ichi, kutambudzwa uku nezvose zvinouya. Chikamu chimwe nechimwe chazvo chinopfuirira nemune chechi imwe neimwe. *Makereke.*

...Zvinoreva *Mweya* kumakereke; *Anokunda*...
 (Muchechi ipi? YeEfeso? Hongu. Zvakanaka. Smirna?
 Hongu, ose zvawo.) ...Anokunda mumachechi ose
haangakuvadzwi norufu rwechipiri.

¹¹⁵ Uyo ari muchechi yeRaodhikia anokunda chii? Anokunda vaNikoraiti, anokunda zvinhu zvenyika, anokunda masangano aya, anokunda huprisita uhu, anokunda zvinhu zvese zvenyika otengesa zvose, uye anoda Kristu. Hauzokuvadzwi nerufu rwechipiri. Sei? Ane Hupenyu Husingaperi. Hupenyu Husingaperi haugoni kufa. Jesu akati, "Uyo anonzwa kubva kwaNdiri ane Hupenyu Husingaperi, haazombofi. Ndichamumutsa nezuva rekupedzisira."

¹¹⁶ Zvino, zvino, apo...Zvino, mucha...Pachava nevazhinji vanopesana neizvi, asi ndinoda kuti mufungisise chaizvo musati matora sarudzo yenu. Maona? Ndichataura chimwe chinhu zvino:

¹¹⁷ Ndicho chikonzero ndisingatendi kuti kune gehena reZiyendanakuenda. Hakugoni kuva negehena reZiyendanakuenda. Nekuti kana kwakambova negehena reZiyendanakuenda, zvino pagara paine gehena reZiyendanakuenda, nekuti Ziyendanakuenda...Kune mhando imwe chete yeHupenyu Husingaperi, uye ndihwo hwatiri kushingairira tose. Zvino kana uri kuzotsva nekusingaperi uye nemuna Ziyendanakuenda, zvadaro uchafanira kuva neHupenyu Husingaperi uchitsva, uye zvadaro anozova Mwari ari kutsva. Haukwanisi kuva negehena reZiyendanakuenda, uye Bhaibheri rinotaura zviri pachena kuti "gehena rakasikwa." Uye kana rakasikwa, harisi reZiyendanakuenda. Chero chinhu cheZiyendanakuenda hachina kumbosikwa; chakagara chiripo, ndeche muZiyendanakuenda. Zvino Bhaibheri rakataura kuti "Gehena rakasikirwa dhiyabhare nengirozi dzake." Gehena rakasikwa, harisi reZiyendanakuenda. Uye handitendi kuti munhu acharangwa zvemuZiyendanakuenda.

¹¹⁸ Ndinotenda kuti Bhaibheri rinotaura zviri pachena pano, kuti, "Uyo anokunda haazokuvadzwi nerufu rwechipiri." Zvino "rufu." Izwi rokuti *rufu* rino bva pa...ndiko uku, "kupatsanurwa." Zvino, kana tapatsanurwa kubva kuna Mwari, muchivi, tinenge tatofa kare; Bhaibheri rakataura kudaro. Takaparadzaniswa naMwari, takabviswa, takafa muchivi nemukudarika; tiri vatorwa kuna Mwari uye nemuhupfumi hwaVo. Uye zvino patinogamuchira Mwari uye tova neHupenyu Husingaperi, tiri vana vaVo uye nechikamu chaVo.

¹¹⁹ Mukomana wangu mudiki ari apo, Joseph, chikamu changu, zvisinei nokuti ini...zvaangazomboita. Iye...Ndinogona... Anogona kunge asina...Dai ndaive munhu mukuru akapfuma uye ndine nhaka zhinji, anogona, anotogara nhaka yechinhu chose; asi zvakadaro achiri mwanakomana, iye chikamu changu.

Chokwadi, iye chikamu changu. Zvino, handigone kumuramba sekusakwanisa kuzviramba kwandingaita, nekuti iye chikamu changu. Kuongororwa kweropa kwaizoratidza kuti ndewangu. Maona?

¹²⁰ Uye kuongororwa kweRopa kunoratidza kuti uri waMwari here kana kuti kwete. Maona? Muri vana vaMwari uye mune Hupenyu Husingaperi. Asi mweya unoita chivi, *mweya* iwoyo uchapatsanurwa. Ndizvo here? Zvino hauzovepo zvachose. Zvino tarisai. Chero chinhu chakava nemavambo chine magumo, nekuti chero chinhu chakava nemavambo chisikwa. Asi Mwari havana kusikwa, Vakagara vari Mwari. Hapana nzvimbo yaVakasikirwa. Uye nzira chete yatingambova neHupenyu Husingaperi kuva chikamu chekusika ikoko. Kubwinya! Oo, kana taikwanisa kuZviona! Muri kuona here zvamunoitirwa neMweya Mutsvene? NdiMweya Mutsvene, Musiki pachaKe, Mwari Baba muchimiro cheMweya, unonzi “Mweya Mutsvene” nekuti Waive pamutumbi unonzi Jesu, Mwanakomana waKe; uyo Akasika Jesu, mutumbi, ndicho chikonzero Waifanira kufa. Mwari vakagara munyama iyoyi yemunhu, uye chizenga cheropa chakapamurwa, zvino Hupenyu hwakabva muchizenga cheropa hwakadzoka.

¹²¹ Ndicho chikonzero chekuti munamati wakare wemuTestamende Yekare aisakwanisa kuenda... aienda aine kupomerwa kumwe chete kwaave nako paainge auya. Asi muTestamende Itsva, VaHebheru yakataura, kuti, “Munamati achinge anatswa kamwe chete haachina hana yechivi.”

¹²² Zvino, Testamende Yekare; vaiunza gwayana, airiisa pasi, oisa maoko ake pariri, munamati; murisita aicheka huro, onzwa kubuda kweropa, uye onzwa kuchema kwaro. Zvino raifa, uye ainzwa mutumbi waro mudiki uchiomarara, zvino raive rafa. Aiziva kuti aifanira kuva ari iye; gwayana rakatora nzvimbo yake. Murisita aitora ropa, oriisa paartari uye—uye hutsi hwaisimuka mudenga, zvino waive munamato weruregerero kumuna... [Chibenga chisina chinhu patepi—Mupepeti] ... zvino hupenyu ihwohwo hwemhuka hwaisakwanisa kudzoka pamunhu uye woenderana nemweya wemunhu, nekuti mwuya wemhuka. Hupenyu hwemhuka nehupenyu hwemunhu, hwaisakwanisa kuzviita. Asi kana... Ndicho chikonzero aibuda kunze aine chishuvo chimwe chete chekuita chivi, chinhu chimwe chete. Opinda nekuda kwekuita upombwe, zvino opirisa chipiriso chake, uye odzokera kunze chinhu chimwe chete chiru mupfungwa dzake. Ndizvozvo.

¹²³ Asi pano kana munamati... Oo, Chechi yaMwari, musakundikane kubata izvi! Munamati, zvirokwazvo akambofamba achiuya kuMwanakomana waMwari uye nekutenda oisa maoko ake paAri (Oo, ini zvangu!), otarisa ipapo kuchiso chaKe chine mate iwayo akarembera pachiso chaKe, Ropa richiyerera zasi pachiso chaKe, onzwa marwadzo ekuti

“Mwari waNgu! Mwari waNgu! Ko MaNdisiireiko?” Oo, hama, kana ukaona kuti mubhadharo wakadini wakakufira, uye kuti Aive Ani, Emanueri, Mwari vachifa panzvimbó yako.

¹²⁴ Zvino chii chinoitika? Munamati zvino, Chizenga cheRopa ichocco pachakapamurwa muMwanakomana waMwari... Chii chakagadzira chizenga cheropa ichocco?

¹²⁵ Uri chii? Uri kachizenga kamwe kakabva kuna baba vako. Mukadzi haana chizenga cheropa. Mu—mukadzi anogadzira zai bedzi; chirindiro, aripo kuzotakura mwa—mwa—mwana. Asi ropa rinovba kumurume, ndicho chikonzero mwa—mwana achitora zita rababa. Uyezve, asi, mudzimai achiroorwa nemurume, anotora zita remurume, nekuda kwevana; anova chirindiro chemwana waachaberekera murume. Asi sezvandareva: huku inogona kukandira zai, asi kana isina kusangana neshiri hono, harichechenye.

¹²⁶ Ndizvo, ndakati, ndicho chikonzero tiine machechi akare akawanda kwazvo, akatonhora, etsika nhasi uno. Vane pfungwa iyi yechiNikoraiti, vane chitsamha chematendere azere nemazai akaora, zvino haambofe akachechenya nekuti haana... Unogona kuita chero chii kwavari (kuvadana kuti mabhishopi, madhikoni, uye nechero zvese), havambofe vakatenda muzviratidzo zvinotevera vatendi, nekuti havana kumbobvira vava neMurume, Jesu Kristu. Kana ukambopihwa mbeu neMurume iyeye yesimba raMwari...

¹²⁷ Chizenga ichocco cheRopa pachakapamurwa ipapo paKarivhari, uye Hupenyu ihwohwo hwaive huri imomo, Jehovha mudiki-diki... Oo, zvinofanira kunge zvichishamisa!

¹²⁸ Munoziva, munhu wese ari kutsvaga chiratidzo. Havasi here? Munhu wese anoti, “Oo, ndiratidze chiratidzo.” MuJudha akati, “Ndiratidze chiratidzo.”

¹²⁹ Regai ndikupei chiratidzo. Mwari vakakupai chiratidzo imwe nguva. Vakakumbira chiratidzo. Israeri yakakumbira chiratidzo. Vakaudza muporofita, “Ndichavapa chiratidzo chekusingaperi: mhandara ichabata mimba. Mhandara ichabata mimba uye ichabereka Mwanakomana.” (Ameni.) “Achadaidzwa kunzi *Imanueri*, ‘Mwari vanesu.’” Chiratidzo chikurusa chakambopihwa.

¹³⁰ Apo Mwari, Musiki wematenga nenyika, vakaita hurongwa hwenyeredzi muchadenga. Ndakamira kunze uko paGomo Palomar ndokutarisa kuburikidza nemusikopu kure ikoko, uye unogona kuona chinhambwe chakasvikwa nechiedza mumakore mamiriyoni zana anemakumi maviri. Zvipatsanure kuva mamaera, uye mberi kwacho kuchine mwedzi, nenyeredzi, nedzinyika, uye Vakazvisika zvose. Vakangodzifuridzira kubva pamaoko aVo, saizvozvo. Hongu!

¹³¹ Zvino Musiki mukuru iyeye akava Muponesi wangu. Akadzika kukachizenga kadiki keRopa, kwete kuburikidza

nemurume, asi akauya zvisinei nokuita kwemurume kumudzimai; ndokutora mukume mudiki uyu kubva kumudzimai, ndokuZvigadzirira imba diki ndokugara mairi. Oo, zvi—zvi—zvinofanira kunge zvichishamisa! Jehovha! Jehovha, vari pamusoro pemurwi wemanyowa mudanga, vachichema. Jehovha, vari muchidzyiro chehuswa. Ndicho chiratidzo chekusingaperi, vamwe vevanhu ava vane musoro wakakura! Jehovha, Mwari, vari Mwana ari kuchema (Hareruya!) ari mudanga rainhuwa. Zvino tobva tafunga kuti tiri mumwe munhu, wakasimudza mhuno yako mudenga; kukanaya, kwaizokunyudza; uye zvadarwoenda hako uchifunga kuti uri mumwe munhu. Uye Jehovha vakarara mudanga, vari pamusoro pe—pemurwi wemanyowa, vachichema sekadiki... chero kamwana kadiki. Zvinofanira kunge zvichishamisa! Chiratidzo ichocco. Mwari vakati, “Ndichakupai chiratidzo chekusingaperi.” Ndicho chiratidzo chemazvirokwazvo. Jehovha, vachitamba semukomana. Jehovha! Jehovha, vachishandira muimba yebasa, vachicheka mapuranga semuvezi wemapuranga. Hareruya! Ini zvangu, oo, ini zvangu! Jehovha, vachigeza tsoka dzevaredzi. “Ndichakupai chiratidzo.”

¹³² “Oo, asi tinofanira kuva nevafundisi, munoziva, vane zvishongo nematambo ose, makora, uye...” Maona? Oo!

¹³³ “Ndichakupai chiratidzo chekusingaperi.” Jehovha, vakamira muzvivanze nemate kumeso kwaVo. Jehovha, vakatambanudzwa vakashama, mumutumbi, vari pakati pematenga nenika. Vakazvidza kunyadziswa kwemuchinjikwa. Tine mufananidzo waVo pano Vakamonerwa kajira kadiki; hongu anongori muvezi akazviita. VakaMukurura hanzu kusara akashama, ndokuMunyadzisa! Oo, boka iroro revanyengeri nguva iyoyo payakasvika! Rino izuva remunhu, zuva raShe riri kuuya. Jehovha! Jehovha, vachifa, hongu, hapana chakaitika. Jehovha, vachinamata, hapana chakaitika. Hmm. Ndizvozvo chaizvo. Zvinofanira kunge zvichishamisa! Ndicho Chiratidzo chekusingaperi. Ndicho chiratidzo chaizozivikanwa nevanhu vose. Zvino Vakabva vafa, Jehovha vakafa. Ipapo nyika ikabva yatanga kundengendeka. Oo, ini zvangu!

¹³⁴ Ndokubva Vamuka kubva mubwiro ndokukwira Kumusoro. Jehovha, vachidzoka muchimiro cheMweya Mutsvene kuti vagare muChechi yaVo, pakati pevanhu vaVo. Kubwinya! Jehovha, vachifamba vachidzika nemuchechi, vachinzvera mifungo yepfungwa. Jehovha, vachipodza vanorwara. Jehovha, vachitaura kubudikidza nemiromo kusvikira munhu wacho asisazvitungamirire pachake. Jehovha, vachidzoka muChirungu nekuchidudzira. Munoda chiratidzo here? Amen! Jehovha ivavo vakadzika zasi kuchipfeve, vakachisimudza, apo akanga aka—akanga akaderera kwazvo kusvikira imbwa dzaisamutarisa, ndokumushamba akachena sechando ndokumupa moyo wakachena sehana. Oo, ini zvangu! Jehovha, vachitora

chidhakwa chakarara ipapo mumukoto nenhunzi dzizere kwese pamuromo wake, uye vomuita kuti aparidze Vhangeri...?... Ropa raJesu Kristu richitichenesa!

¹³⁵ PaAive panyika, Akaenda kuguta rakadereresa raivapo, nekuvanhu vakadereresa vaivako, uye vakaMupa zita rakadereresa raivapo. Ndizvozvo chaizvo. VakaMuitira zvakaipisia, vakaMudana zita rakaipisia raigona kudanwa, "Bherizebhabhu," dhimoni. Rakadereresa ravaigona kuMupa, munhu akaMupa.

¹³⁶ Asi Mwari vakaMusimudzira, ndokuMupa Chigaro chehushe chakakwirira kwazvo kusvikira Anotofanira kutarisa zasi kuti aone Denga. Ameni! Kubwinya! NdokuMupa Zita riri pamusoro pemazita ose anotaurwa Kudenga nepanyika, uye mhuri yose Kudenga nepanyika inoshevedzwa saYe. Ndizvo zvakafungwa nemunhu pamusoro paKe; ndizvo izvo Mwari vakafunga nezvaKe. O Mwari, regai pfungwa dzangu dzive sedzeNy, Baba. Hongu, changamire. O Zita rinokosha!

¹³⁷ Zvino, "Uyo anotenda maNdiri ane Hupenyu Husingaperi." Zvino, kana paine mhando imwe chete yeHupenyu Husingaperi, uye wohuwana uye tiri kuutsvaga kubudikidza nemuna Jesu Kristu, ndihwo Hupenyu hwaMwari. Zvino chizenga chiya cheRopa pachakapamurwa paMwanakomana waMwari, uye Jehovha vadiki ivavo vakanga vakaputirwa mukati meMurume uyu anonzi Jesu (apo maAri maigara huzaro weHumwari mumutumbi), uye zvino patinogamuchira Ropa *iroro* kuti tikanganvirwe zvivi zvedu, Mweya iwoyo wakanga usiri pamunhu, asi pana Mwari...Kubwinya! Bhaibheri rakati, "Ropa raMwari."

¹³⁸ Mumwe munhu akati, "Munorangarira, Iye...Usataura chinhu pamusoro pemaJudha, nekuti Aive muJudha." Akange asiri muJudha. Akange asiri muJudha kana Murudzi, Aiva Mwari. Ndizvozvo chaizvo. Akanga ari Ropa rakasikwa. Mwari vakariita rakatsaurwa. Raive raVo Ivo, uye kubudikidza neRopa iroro rakasikwa tinoRigamuchira sekuregererwa kwedu nekuti Akafa rufu kuitira isu. Chizenga ichocho cheRopa chakapamuka, ndokusunungura Mweya Mutsvene iwoyo kuti udzoke patiri, uye zvino tiri vanakomana nevanasikana vaMwari kubudikidza nekuberekwa neMweya. Zvino Hupenyu ihwohwo hwaive hwaMwari, hwakange husina mavambo kana kuzombofa wakava nemagumo, ndehwangu nehwako nenyasha dzaMwari muna Jesu Kristu. Hezvoka izvo.

¹³⁹ Zvino, "gehena," tichadzokera kwariri kwechinguva. Ndinokuudzai kuti-kuti hakungazovi...Ndinotenda mugehena rinobvira. Hongu, changamire, Bhaibheri rakataura kudaro, dziva remoto. Zvino, asi harigoni kuva rekusি... harigoni kuva reZiyendanakuenda. Rinogona kuva...Bhaibheri harina kumboti ndere muZiyendanakuenda, Rakati gehena

“renarinhi.” Haritaure izwi rekuti Ziyendanakuenda, rinoti gehena “renarinhi.” Zvino, rakagadzirirwa dhiyabhire nengirozi dzake; gehena renarinhi, kwete reZiyendanakuenda. Zvino, mushure... Mweya iwoyo unogona kutambudzwa ikoko nekuda kwezviito zvavo kwemakore mamiriyoni gumi, sokuziva kwandingaita. Handizive kuti *narinhi* ingavei mumaziso aMwari. Inogona kuva yemaminitsi mashanu, inogona kuva yemakore miriyoni, inogona kuva yemakore mamiriyoni gumi, asi kuchasvika nguva apo mweya iwoyo pauchaguma kuvapo.

¹⁴⁰ Hezvinoi zvakataurwa neBhaibheri, munooona:

... *Anokunda haangakuvaldzwi norufu rwechipiri.*

¹⁴¹ Rufu rwekutanga kuparadzaniswa nevadikanwi vedu. Tinopinda muHupo hwaMwari, hatizobvi muHupo hwaVo. Maona? Zvino, kana paine rufu rwechipiri, zvino rwunozofanirwa kuva rufu rwemunhu wemukati. Uye zvadaro uyo anokunda nyika, kana kukunda zvinhu zvenyika, ane Hupenyu Husingaperi uye haazobatwi nerufu rwechipiri. Hezvoka izvo, Hupenyu Husingaperi. Asi mu—mutadzi... Bhaibheri rakati, “Mukadzi anorarama mumafaro akafa achiri mupenu.” Ndizvo here? “Mweya unoita chivi, zvirokwazvo uchafa.” *Kufa chii?* “Kuparadzaniswa” zvachose, “hapachisina.” Maona? Zvino, wagurwa, ndizvozvo. Wagurwa, hauchisipo. Ichave nguva yakareba zvakadini kuita izvozvo? Uchadzika nenzira imwe chete wawakaya nawo, uye uchasvika panzvimbio yekuti hapazovi kana nechinhu chinosara chawo. Uchangodzokera kune chero zvawakagadzirwa nazvo.

¹⁴² Tinogona kutora chizenga, topamura chizenga kuita chizenga chimwe chete, kune chimwe chizenga, kusvikira wadzika kusvika kuchizenga chekutanga; wopamura chizenga ichocco, zvino wava nezvinoumba ropa; unopinda muzviumbiso zvakasiyana zveropa, uye zvadaro unodzika kuchikamu chidiki chiri muchizenga ichocco: ndiwo hupenyu. Havagoni kuwana ichocco. Hapana chavanoziva nezvacho. Zvino, hupenyu ihwohwo pakupedzisira hunosvika pekuti hauzovepo; zvingavei zvinoumba hupenyu ihwohwo, handitendi kuti hune chero zviumbiso. Zvinozova zviri zvemweya.

¹⁴³ Uye zvakare, mune iroro, pakupedzisira hunozopatsanuka uye unenge uchisipo. Ndizvo zvakataurwa neBhaibheri, “Mweya unoita chivi, uchafa.” “Uye avo vachakunda mumazera aya echechi havazokuvadzwi nerufu *rwechipiri.*” Mutumbi unotanga kufa, tevere mweya wofa zvino hauzovepo. Maona? Ndizvo... munotenda here kuti iBhaibheri rinotaura kudaro?

¹⁴⁴ Zvino rangarirai, kana gehena riri reZiyendanakuenda, zvadaro Bhaibheri rinokanganisa parakati “gehena rakasikwa.” Uye zvakare kana munhu ari kuzotsva Nekusingaperi, mugehena, zvino anofanira kuva neHupenyu Husingaperi kuti ange achiziva, kuti atsve. Ndizvo here? Saka, kune mhando ngani

dzeHupenyu Husingaperi? Imwe chete. Ndizvozvo chaizvo. Hupenyu Husingaperi humwe chete bedzi.

¹⁴⁵ Zvino, usaende uchiti, “Hama Branham havatendi mune gehena.” Hama Branham vanotenda mune gehena. Bhaibheri rinodzidzisa kuti kune gehena. Sekungova chokwadi chokuti kune nzvi—nzvimbo yezororo, kune nzvimbo ye—yekurangwa. Uye Mwari zvirokwazvo vachaita kuti mwuya unoVatadzira urangwe. Uye nokuramba Jesu Kristu seMuponesi wako, zvirokwazvo ucharangwa nekuda kwazvo. Asi pachava nenguva yauchange usisipo. Asi kuti zvinokutorera makore mamiriyoni mangani kuti udzokere kune izvozvo, handizivi. Asi imwe nguva...

¹⁴⁶ Uri munhu wemunguva kusvikira waberekwa patsva, zvino wava munhu wemuZiyendanakuenda. Uye nzira yoga yaunogona kuUwana kuva nechikamu chaMwari mauri, huri Hupenyu Husingaperi. Munogona kuzviona here? Zvirokwazvo.

*Ane nzeve, ngaanzwe zvinoreva Mweya
kumakereke; . . .*

¹⁴⁷ NdinoMuda. Hamudaro here? Ndinofara kwazvo kuva neHupenyu Husingaperi. Izvozvo hazvichandinetsi zvachose, nekuti tine Hupenyu Husingaperi zvino. Uye ndinozviziva, uye ndinovimba kuti munhu wese achava naHwo, tese hedu.

¹⁴⁸ Irenaeus, hongu, ndanga ndine chinyorwa pano nezvaIrenaeus, ndave kuda, “kuverenga nhoroondo iyi.” Kuti chikonzero Irenaeus akasarudzwa ndecekuti aiva nezviratidzo zveChechi (yepamavambo) yePentekosti zvichimutevera.

¹⁴⁹ Zvino, kana Mwari... Vangani vanotenda kuti Chechi yakatanga paPentekosti? Zvakanaka. Vangani vanotenda kuti Mwari vakatsigira Chechi paPentekosti? Zvakanaka, changamire. Zvino kana iyoyo yaive Chechi yekutanga yaMwari, uye ndiyo yaVakadana kuti “Chechi,” uye Ndiye Muzambiringa zvino, tiri mapazi, kana Muzambiringa ukazoburitsa rimwe bazi, richazovei? Pentekosti. Hongu! Zvino, pamwe kwete nezita. Zvino tine *mazita* ePentekosti, asi zvakangofanana nokunzi Methodisti, Baptisti, Presbyteriani, muPentekosti. Hazvireve chinhu, munoono, ringori zita bedzi. Asi chero bedzi uine Chiihiko chePentekosti mumoyo mako, Pentekosti mumwuya wako, ichikupa Hupenyu Husingaperi, zvino Mwari vakakuvimbisa izvozvo, “Hauzombobatwe nerufu rwechipiri;” kuti, une Hupenyu Husingaperi uye *haugoni* kubatwa nerufu rwechipiri. Maona? Une...uri...

¹⁵⁰ “Usachemedza Mweya Mutsvene waMwari.” Zvino, usaUchemedza (kuita zvinhu zvakaipa). Kana ukadaro, uchazvibhadharira; nekuti Bhaibheri rakati, “Usachemedza Mweya Mutsvene waMwari wawakasimbiswa mauri kusvikira pazuva rekudzikinurwa kwako.” Ndizvozvo here? “Usachemedza Mweya Mutsvene.”

¹⁵¹ Oo! Richava zuva rinoshamisa, mamwe mangwanani, dzimwe dzenguva idzi. Kukuratidzai kuti rumuko rwunenge rwuri rwepasi rose, "Kuchava nevaviri mumunda, zvino Ndichatora mumwe chete; uye vaviri pamubhedha, zvino Ndichatora mumwe chete." Munona, huchange huri husiku kune imwe nzvimbo, uye masikati kune rimwe divi renyika; ruchave rumuko rwepasi rose, Kubvutwa ikoko. Hwamanda yaMwari icharira, uye vese veaya, vechechi diki *iyi apa, apa, apa*, uye kunyange nekaboka kadiki ikako kakapfuura neapo, ndokubuda neapo, *apa, apa, apa*.

¹⁵² Apo mhandara iyoyo, mhandara iyoyo payakaona munguva yekurinda yechinomwe kuti... Zvino, rangerirai, kwaiva nemhandara nomwe. Ndizvozvo here? Kana kuti, ndinoreva, mhandara shanu dzakabuda... Mhandara gumi dzakabuda kunosangana naShe, shanu dzaive dzakangwara uye shanu dzaive dzakapusa. Ndizvozvo here? Uye zvino, munguva dzokurinda zvakadaro, paiva nenguva nomwe. Zvino pakupera kwenguva yechinomwe (vamwe vakarara kubva panguva *iyi, iyi, iyi, iyi, neiyo, ...*), nguva yechinomwe, pakava neizwi rakadanidzira, "Tarirai, Chikomba chasvika, budai kunze munosangana naCho." Zvino vakamuka vakagadzira marambi avo. Uye vamwe vose ava vakamuka neapo. Oo, haingazovi nguva yakanaka here!

Oo, taisiimba karwiyo kadiki:

Inguva yakanakisa kwaauri,
Inguva yakanakisa kwandiri;
Kana tose tikagadzirira kusangana naJesu
Mambo wedu,
Ichava nguva yakanakisa sei.

Pano, ngationei kana tikakwanisa kurwuimba irworwo:

Nguva yakanakisa kwaauri,
Nguva yakanakisa kwandiri;
Kana tose tikagadzirira kusangana naJesu
Mambo wedu,
Ichava nguva yakanakisa kwazvo. (Hazvizovi
zvakanakisa here?)

Oo, hazvisi kuzofadza here ikoko,
Tisina mitoro yekutakura?
Tichiimba nemufaro nemabhero emoyo ose
achirira,
Oo, hazvisi kuzofadza here ikoko?

¹⁵³ Vangani venyu vanoziva kuti muchasvika kumba? Vangani vanoziva kuti muchabuda nepasuwo iro? Hamuzivi. Vangani vanoziva kuti kana mukabuda muchadzoka muno zvakare? Haungazivi. Saka usarega husiku huno huchipera; usakundike Mwari muhusiku huno, nekuti huno hunogona kuva husiku hwekedzisira hwaungave nenguva kana mukana. Umbori ani,

zvakadaro? Wakabva kupi? Uri kuenda kupi? Bhuku roga pasi rose rinogona kukuudza zvazviri, ndiro Bhaibheri rekare iri rakanopafadzwa pano. Uye ndiro Bhaibheri ratinotenda mariri, ndivo Mwari vatinotenda mavari.

¹⁵⁴ Uye kana usiri muMwenga iwoyo, mukaboka kadiki aka kevashoma, zasi-zasi *apa* nhasi uchimanikidzirwa kunze nezvitendwa nemasangano, nezvimwe zvakadaro, kana—kana—kana usiri muboka diki iroro... Zvino, hausungirwe kujoinha tabhenakeri ino, hausungirwe kujoinha chero chii zvacho, unongofanira kuberekwa muHumambo ihwohwo. Zvino, kana uchida kuyanana kwako muMethodisti, Baptisti, Presbyteriani, chero kupi kwaunokuda, zviri kwauri. Munoonaa, isa kuyanana kwako nechero munhu waunoda. Asi ndichakuudzai chinhu chimwe: kana wakaberekwa patsva, unoziwa, “dzinofura nzivani...” Ini zvangu!

¹⁵⁵ Mumwe munhu akandibvunza imwe nguva, akati, “Hama Branham, makaudza vanhu, ‘Dzokerai kuchechi yeMethodisti.’”

Ndikati, “Chokwadi. Ngavavadzingire kunze, uye havana kwekuenda.” Saka zvino tichaona...

Zvakanaka, dzokera, haizovi nguva yakanyanya kureba, munoonaa. Haizovi nguva yakanyanya kureba, vachange vadzoka zvakare.

¹⁵⁶ Munoziva, imwe nguva mu...Noa...areka, nzvimbo yechenetedzo, Noah, ipapo paiva nemafashamo makuru akauya. Uye saka Noa akaburitsa gunguwo muareka, zvino rakangoenda richingorira richitarisa-tarisa kwese. Handiti, rakagutswa, nekuti raive gora pakutanga kwacho. Raigona kubhururuka richibva pane chitunha chakare chakafa, uye rozadza dumbu richidya kubva panyurusi iri, roenda neche uko pane iyi—pane hwai iyi yakare rozadza dumbu richidya kubva pairi, uye nechimwezve chinhu, apo painge pachingova nemhando dzose dzezvitunha zvakare zvakafa zvaive zvakarara kwese-kwese.

¹⁵⁷ Saka gunguwo rinongogara pasi ipapo rotanga kurira, “Vakomana, ndiri kuzviwanira jubheri ndiri ndega!” richingorira.

¹⁵⁸ Asi pavakasunungura njiva diki kunze, yakange ine hunhu hwakasiyana. Kunhuhwa ikoko, iyo “yakange isingakude. Hmm!” Sei? Njiva haina kana nduru; ndiyo shiri yoga isina nduru. Yaisagona kuzvigaya mudumbu, saka chinhu choga chayaigona kuita kudzokera chaiko kuareka yorova-rova pamusuwo.

¹⁵⁹ Chingoenda chero kupi kwaunoda kuenda. Chinhu choga chandiri kukukumbira kuti uite kungouya upinde muHumambo, uye ndinoziva kwauchaenda. Hauzombozvifariri zvachose, hama, uchatyi, “Ndayambuka mutsara wekupatsanura,

ndasiya nyika ino kumashure." Hongu, changamire. Chokwadi ndizvozvo.

Oo, vakange vakaungana mukamuri
yekumusoro,
Vose vachinamata muZita raKe,
Vakabhabhatidza neMweya Mutsvene,
Zvino simba rokushumira rikauya;
Zvino zvaAkavaitira nezuva iroro
Anokuitirawo zvimwe chete,
Ndinofara zvikuru nokuti ndinogona kuti ndiri
mumwe wavo. (Hausi here?)
Mumwe wavo, ndiri mumwe wavo,
Ndinofara zvikuru nokuti ndinogona kuti . . .
mumwe wavo; (Hareruya!)
Mumwe wavo, ndiri mumwe wavo,
Ndinofara zvikuru nokuti ndinogona kuti ndiri
mumwe wavo.

Vangani vanofara nokuda kwazvo manheru ano? Oo, ini zvangu!

Huya, hama yangu, utsvage ropafadzo iri
Rinochenesa moyo wako kubva pachivi,
Iro richatangisa kuti mabhero emufaro arire
Uye richachengeta mweya wako uchibvira;
Oo, riri kubvira zvino mukati memoyo wangu,
Oo, Zita raKe ngaribwinyiswe,
Ndinofara zvikuru nokuti ndinogona kuti . . .
mumwe wavo.
Ndiri mumwe wavo, ndiri mumwe wavo,
Ndinofara zvikuru nokuti ndinogona kuti . . .
mumwe wavo; (Hareruya!)
Mumwe wavo, ndiri mumwe wavo,
Ndinofara zvikuru nokuti ndinogona kuti ndiri
mumwe wavo.

¹⁶⁰ Zvino apo tichiimba ndima iyi inotevera, ndinoda kuti mukwazisane maoko, sezvamunoita husiku hwega-hwega, maMethodisti ose, nemaBaptisti, nemaPresbyteriani. Kwazisanai maoko mumwe nemumwe, uye kunyangwe kuva nehushamwari hwekutsengerana chingamu, kana muchikwanisa. Zvino chingovai nehushamwari chaihwo, hwemazvirokwazvo, muchiva makasununguka nevamwe zvino apo tichirwuimba:

Ndiri mumwe wavo, mumwe wavo,
Ndinofara zvikuru nokuti ndinogona kuti ndiri
mumwe wavo;
Mumwe wavo, mumwe wavo,
Ndinofara zvikuru nokuti ndinogona kuti ndiri
mumwe wavo.

Kunyangwe vanhu ava vangave vasina
 kudzidza,
 Kana kuganza nemukurumbira wenyika,
 Vose vakagamuchira Pentekosti yavo,
 Vakabhabhatidzwa muZita raJesu;
 Uye vari kutaurira zvino, kwese kure
 nekwakapararira,
 Simba raKe richiri rimwe chete,
 Ndinofara zvikuru nokuti ndinogona kuti . . .

Zvino ngatinyatsorwuimbei:

Oo, mumwe wavo, mumwe wavo,
 Ndinofara zvikuru nokuti ndinogona kuti . . .
 mumwe wavo; (Hareruya!)
 Mumwe wavo, mumwe wavo,
 Ndinofara zvikuru nokuti ndinogona kuti ndiri
 mumwe wavo.

¹⁶¹ Ungada here kuva mufiri wechitendero waKe nevaSmirna? Kana zvikasvika pekuti waifanira kuzotarisana nerufu kana kuramba, waizotarisana narwo here? Hongu, changamire. O Mwari, waizova mufaro. Hongu, changamire. Ndiyo nzira yandinoda kuenda nayo, ndiri mupurupiti chaimo. Ndizvozvo chaizvo. Ndakafunga kuti ndarwuwana uye vaizozviwana muGermany kuno kasiri kare. Oo, vaida kundipfura vakatarisa nemusikopu yehusiku, zvino masoja echijerimani vakamhanyira pose pandiri vakadzivirira saizvozvo. Ndakafunga, “Chaizova chinhu chakanakisa sei kufira Ishe wangu pano chaipo mumunda wekuvhangera.” Oo, ini zvangu! Chinhu chakanakisa sei—sei.

¹⁶² Saka, regai ndikuimbirei karwiyo kadiki. Ndodaro here? Mune—mune nguva here yekamwe kadiki-diki chete? Zvakanaka. Handikwanisi kurwuimba, ndicharwutaura. Oo, ndakagara ndichida kuimba. Uye mamwe emazuva aya paunosvika kumusha wako wakaisvonaka wakakura kumusoro uko muParadhis, zasi-zasi kumucheto kwemasango zasi ikoko, uko Russell Creech nen ikwatichange tiri tichivhima, munoziva. Zasi-zasi kumucheto kwemasango kune kaimba kemapuranga ikoko kanoimbwa nezvako naHama Neville, *Ndivakirei Kamba Kemapuranga muKona*, (Ndakafunga kuti vaitaura nezve nzvimbo yangu.) *muNyika yemuKubwinya*. Mamwe emangwanani ano paunobuda pavharanda rako guru ikoko, wotarisa kwakapotereda saizvozvo, zasi-zasi uko mukona unonzwa mumwe munhu achiimba:

Nyasha dzinoshamisa! ruzha rwunotapira sei,
 Dzakaponesa munhu wakaparara seni!

¹⁶³ Unoti, “Saka, Mwari ngavarumbidzwe, Hama Branham vakare vakunda. Havo vari apo, ndinovananzwa vakamira neche uko izvozvi, vachiimba *Nyasha Dzinoshamisa*.”

¹⁶⁴ Dzichange dziri nyasha dzinoshamisa dzandiunza ikoko.
Ndizvozvo chaizvo.

Asi riri kujuja ropa, hongu, (Ndosaka ndiri
kuparidza iRi.) riri kujuja ropa,
Vhangeri Iri reMweya Mutsvene riri kujuja
ropa,
Ropa revadzidzi vakafira Chokwadi,
Vhangeri iri reMweya Mutsvene rinoramba
richijuja ropa.
Wekutanga kufira chirongwa ichi cheMweya
Mutsvene,
Aiva Johane Mubhabhatidzi, asi akafa zvake
somunhu;
Zvino tevere Ishe Jesu, vakaMuroverera
pamuchinjikwa,
Akadzidzisa kuti Mweya waizoponesa vanhu
kubva kuchivi.
Paiva naPetro naPauro, uye Johane mutsvene,
Vakapira hupenuy hwavo kuitira kuti
Evhangeri iyi igopenya;
Vakavhenganisa ropa ravo, sevaporofita
vekare,
Kuti Shoko raMwari rechokwadi ritaurwe
zvakatendeka.
Pane mwuya iri pasi peartari, (vakafira
chitendero ava,) iri kuchema, “Kusvika
riinihi?”
Kuti Ishe varange avo vakaita zvakaipa;
(Teererai! Nekukurumidza!)
Asi pachave nevamwezve vachapa ropa
rehupenyu hwavo
Nokuda kweVhangeri iri reMweya Mutsvene
uye namafashama aRo matsvuku.
Riri kujuja ropa, hongu, riri kujuja ropa,
Vhangeri Iri reMweya Mutsvene riri kujuja
ropa,
Ropa revadzidzi vakafira Chokwadi,
Vhangeri iRi reMweya Mutsvene rinoramba
richijuja ropa.

¹⁶⁵ Oo, kuchava....

[Imwe hanzvadzi inotaura nendimi, imwe hama inodudzira.
Imwe hama inotaura nendimi, imwe hanzvadzi inotaura
nendimi. Chibenga chisina chinhu patepi. Imwe hama inopa
dudziro—Mupepeti] Kubwinya. Ameni. Ameni. Hmm. Hmm.
Kubwinya. Ameni. Hongu.

¹⁶⁶ Ameni. “Uyo ane nzeve, ngaanzwe zvinoreva Mweya
kumachechi.”

NdinoMuda . . .

Namatai zvino, onai zvaAchaita. Kana wanga usina kumbobvira wakaMuda kumashure, ungadawo here kuMuda zvino? Ungasimuka here woMucherechedza, uMutore seMuponesi wako?

. . . ini, (Mwari vakuropafadzei, hama.)

Ndokutenga . . .

Mumwezve munhu amire, achiti, “Ndiri kuMuda, iko zvino, ndiri kuda kuMuda”?

. . . Ruponeso

Pane weKarivhari . . .

Mwari vakuropafadzei, hanzvadzi. Mwari vakuropafadze kumashure uko, mudzimai wechidiki.

NdinoMuda . . .

Uyo ane nzeve, ngaanzwe zvinoreva Mweya kuchechi.

. . . Akatanga kundida

Ndokutenga ruponeso rwangu

Pamuti weKarivhari.

¹⁶⁷ Baba vedu veKudenga, Muchiona vatatu ava vakamira netsoka dzavo, O Mwari, ndinoKukumbirai kuti muve netsitsi, O Imi vemuZiyendanakuenda, nekuvapa kuregererwa kwechivi chose, neruponeso, Mweya Mutsvene muhupenyu hwavo, kuti vasabatwa nerufu rwechipiri. Vanocherechedza, Ishe, manheru ano, vakamira ipapo, kuti—kuti pane chimwe chinhu chaswedera pedyo. Mweya Mutsvene wapa yambiro. Kuona Mweya waMwari uchiwira pakati pevanhu, kuUona uchishanda maererano neMagwaro, angori mashoko endimi matatu chete ndokuvhara. O Mwari, shoko kumunhu mumwe nemumwe.

¹⁶⁸ Zvino, Baba, tinoKukumbirai kuti muve netsitsi. Regai Mweya iwoyo unokosha ugare pakati pedu. NgatiUremekedzei, Mwari; zviitei. Torai mwuya iyi muchengetedzo yeNy, Baba, ndivo zviberekro zveMharidzo manheru ano, uye neshoko rabva kuMweya Mutsvene rataurwa pakati pedu. Uye tinokumbira, Mwari Baba, kuti Muve navo mazuva ose ehupenyu hwavo. Uye dai “munyika isina magumo” dai tasangana navo imomo, vakaponeswa neRopa nenyasha dzaKristu. Tinovapa kwaMuri zvino, Baba, vazadzei neMweya weNy, Mutsvene. Nekuti tinozvikumbira muZita raJesu. Ameni.

¹⁶⁹ Mwari vakuropafadzei, hama dzangu. Chero ani zvake ari pedyo nevanhu ivavo vanga vakamira, Makristu, kwazisai mawoko avo pavagara pasi, vapei . . . muvati vafambe zvakanaka.

¹⁷⁰ Maona here kuti Mweya Mutsvene unoteerera sei, kuti Unoziita sei kuri kumagumo chaiko? Maona? Bhaibheri rakati, “Regai . . . avo vanotaura nendimi ngavave vaviri, kana kuti

kwete . . . vasingadarike vatatu,” munoona. Shoko rendimi kwete pandanga ndichitaura, mushure mekunge zvese zvapera. Ndiwo maitiro azvinofanira kuva, munhu wose achiremekedza chaizvo uye achiteerera kune zvinotaura Mweya. Zvino chii chazoitika? Vatadzi vasimuka kuzotendeuka. Oo, pafunge. Mweya Mutsvene pachaWo, usiri kuzvibata . . . kunyangwe nemuShoko, wauya ukaratidza.

¹⁷¹ Ndinoziva vamwe vevanhу ava vari kutaura nendimi, ndinoziva vatatu vavo vose vataura; uye ndi—ndinoziva avо vapa dudziro; ndinoziva kuti hupenyu hwavo hauna chivi pamberi paMwari. Hama Neville vari pano, mufundisi wedu, mushumiri weMethodisti; mushumiri weMethodisti, akagara pano, akagamuchira Mweya Mutsvene. Junie, neche pano apa, Hama Jackson, mumwe muparidzi weMethodisti, akagamuchira Mweya Mutsvene. Ndizvozvo, ane chipo chendimi nekududzira.

¹⁷² Uye munocherechedza kuti tinoita sei nechechi, munhu wose achiremekedza; Mwari vachitaura. Munoona matauriro aVanoita chaizvoizvo zvinoenderana neBhaibheri; mumwe; shoko rikasanzwikwa zvakanaka, Vanoritaura zvakare, asi haVataure kanopfuura katatu; munoon, maererano neMagwaro apo. Munoon, Vachapa shoko racho; Havambozvihiringidzi, “nokuti mweya wevaporofita unoziisa pasi pemuporofita.” Zvese zvinoteererera uye chinyararire . . .

¹⁷³ Zvino ndiyo nzira iyo chechi yainofanira kuva muhurongwa. Zvino kwamuri imi vanhu vangave vari pano vanobva kunze, vandinzwа ndichizvitaura, ndiyo nzira yazvinofanira kuva. Munoon, shoko rinopihwa. Maona zvabudapo here? Zvinoitika pakare *ipapo*. Chimwe chinhу chinoitika, chaizvoizvo sekunzvera kana mumwewo mweya. HaVashamise here? Oo, ndinofara kwazvo kuziva kuti chinhу chimwe chete ichocco chakagadzwa naMutsvene Pauro, *pano* chaipo, hachisati chafa ipo *pano*. Chichiri chinhу chimwe chetecho. Oo, ndinofara kwazvo ndinogona kuti ndiri mumwe wavo. Haudaro here? Zvakanaka.

¹⁷⁴ Zvino, mangwana manheru seven o’clock, tiri kutora zera reRaodhikia, uye ndiro zera *rekuroorana*. Ndinoda kuti muuye kana muchikwanisa. Ndanga ndati nonokei zvishoma manheru ano, nekuda kwekuti pamwe Mweya Mutsvene uchitaura nezvimwe zvakadaro. Asi nguva dzichiripo, dzingori twenty minutes after nine. Uye kazhinji ndiri pano ten kana eleven o’clock, saka kukurumidza chaiko zasi kuno. Saka munofarira here mha—mha—mharidzo dzaShe? Munodaro chaizvo here? Ichipa chikafu kumweya wako.

¹⁷⁵ Mwari vakuropafadzei, vana vangu. Munoziva, ndinokudai nemoyo wangu wose. Uye dzimwe nguva kana Mweya wandibata, unocheka kwese . . . Ndizvo zvirи Shoko, Rakapinza semunondo unocheka nekumativi maviri. Rinocheka

richiuya, richienda, mukati, kunze, nzira dzose. Asi ndizvo zvinotidzingisa. Kudzingisa kunocheka nyama yakawandisa, zvinhu zvatisingafaniri kuva nazvo.

¹⁷⁶ Zvino, ndinoda kuti mucherechedze. Manzwa here Mweya padudziro manheru ano? "Regedzai hupenzi ihwohwo!" Zvinodzingisa. Ivai makaperera! Tose tinobva pamutsara, asi Mwari vanoziva maitiro ekutibvisa mapundu. HaVadaro here? Vanonyatsodaro. Ndinotenda nekuda kwazvo. Haudaro here?

¹⁷⁷ Ndiwe muridzi mudiki wepiyano pano here? Handioni... Ko Teddy...? Handimuoni pano chero papi zvapo. Ko-ko ndiye here...? Zvakana, hanzvadzi, kana mungadaro. Mwanasikana wenyu here, Hama Daulton? Muroora. Zvakana. Mudzimai mudiki akaisvonaka kwazvo, ndinofara kwazvo kuti uri Mukristu. Zvakana, nderupi rwiyo rwedu rwakanaka, rwakare rwekuparatzana? Ngatiedzei rumwe chete, tisati tadaro, zvino. Mirai zvishoma, hanzvadzi, tisati taimba *Tora Zita Rajesu Newe*.

¹⁷⁸ Vangani vanoziva *Usakanganwe Munamato Wemhuri?* Vangani vanonamata mumhuri menuy, mhuri yenu inonamata? Oo, zvakana. Ngatirwuedzei kamwe chete, sezvakangoita nguva dzekare zvino:

Usakanganwe munamato wemhuri,
Jesu anoda kusangana newe ipapo;
Iye achatora mitoro yako yose,
Oo, usakanganwe munamato wemhuri.

Munozvifarira here? Ngatirwuedzei zvakare:

Usakanganwe munamato wemhuri,
Jesu anoda kusangana newe ipapo; (Une
musangano, zvino.)
Iye achatora mitoro yako yose,
Oo, usakanganwe munamato wako wemhuri.

¹⁷⁹ [Imwe hanzvadzi inoti, "Hama Branham, ndingataurewo here chimwe chinhu?"—Mupepeti] Chokwadi munokwanisa, Hanzvadzi. [Hanzvadzi inotanga kutaura. Chibenga chisina chinhu patepi.] Hanzvadzi Nash, zvakana kwazvo. Oo, kana mukango:

Kana tikavimba uye tisingapokane,
zvechokwadi Achakubuditsa kunze;
Chingotoru mutoro wako kunaShe zvino
woisiya ipapo.

Isiye ipapo, isiye ipapo,
Tora mutoro wako kunaShe zvino woisiya
ipapo;

Kana tikavimba uye tisingapokane,
zvechokwadi Achakubuditsa kunze;
Tora mutoro wako kunaShe zvino woisiya
ipapo.

¹⁸⁰ Hamufariri here nziyo dzakare? Oo, ndinongo... Ndinotenda kuti varume ivavo vakatora chinyoreso uye vakafemerwa neMweya Mutsvene kuti vaverenge izvozvo.

¹⁸¹ SaFanny Crosby bofu apo vanhu ivavo vemunyika vezuva iroro vakaedza kumuita kuti anyore nziyo dzemunyika, vakati, "Nhai zvako, unozova mudzimai mupfumi."

Akati, "Ndakakumikidza hupenyu hwangu kuna Kristu, netarenda rangu rose." Aive bofu, munoziva. Akati, "Ndi—ndine mungava wekupira hupenyu hwangu nezvose kuna Kristu." Akati...

¹⁸² Uye zvakare vakaita sekusvotwa naye nekuti akaramba mukana wakadaro. Haana kutengesa hudangwe hwake sezvakaitwa naVaPresley nevamwe, asi iye—iye akaramba akachengetedza kuvimbika kwake. Saka iye—iye... Ivo—ivo vakamusiya, vakati, "Zvino kana wasvika Kudenga, kana kuine nzvimbo yakadaro," vakati, "kana uri sezvauri pano, uchange uri bofu." Vakati, "Ko kana uri bofu," vakati, "ungazoMuziva sei?"

Akati, "NdichaMuziva. NdichaMuziva."

Vakati, "Ko kana uri bofu? Ko kana uri bofu?"

Akati, "Ndichanzwa mavanga ezvipikiri." Akabva atendeuka, akatanga kufamba achidzokera, zvino akati:

NdichaMuziva, ndichaMuziva,
Uye ndakadzinkinurwa parutivi rwaKe
ndichamira;
NdichaMuziva, ndichaMuziva
Nemavanga ezvipikiri muruoko rwaKe.

¹⁸³ O Jesu wangu, nemaronda mashanu iwayo anokosha, achiuju ropa nokuda kwangu ikoko, ndaizoramba seiko Iye anokosha? Regai ndife, regai ndiende... Regai ndiende nenzira yechero chinhu, asi musambondirega ndichiramba Uyo anokosha ari kujuja ropa uko akandifira. Hongu.

¹⁸⁴ Uye paunobuda manheru ano, unoda ku: *Tora Zita RaJesu Pamwe Newe*. Zvakanaka, hanzvadzi. Timire tose zvino, tose pamwe chete.

... Zita raJesu pamwe newe,
Mwana wekuswa nenhamo;
Richakupa mufaro nokunyaradzwa,
Ritore kwese kwaunoenda.

Zita Rakakosha, (Zita Rakakosha!) O
 rinotapira sei! (O rinotapira sei!)
 Tariro yenyika nemufaro weDenga;
 Zita Rakakosha, (Zita Rakakosha!) O
 rinotapira sei!
 Tariro yenyika nemufaro weDenga.

Zvino tichikotamisa misoro yedu, nekuimba zvinyoro-nyoro:

PaZita raJesu tichigwadama,
 Towa takazvambarara patsoka dzaKe,
 Mambo wamadzimambo Kudenga
 tichaMugadza korona,
 Kana rwendo rwedu rwapera.

Zita Rakakosha, O rinotapira sei!
 Tariro yenyika nemufaro weDenga;
 Zita Rakakosha, O rinotapira sei! (Rinotapira
 sei!)
 Tariro yenyika nemufaro weDenga.



ZERA RECHECHI YESMIRNA SHO60-1206
(The Smyrnaean Church Age)

MHARIDZO DZAKATEVEDZANA DZECHIZARUO CHAJESU KRISTU

Mharidzo iyi neHama William Marrion Branham, yakaparidzwa kwokutanga neChirungu Chipiri manheru, Zvita 6, 1960, paBranham Tabhenakeri muJeffersonville, Indiana, U.S.A., yakazotorwa kubva patepi yakarhekodwa ndokuzodhindhwu muChirungu pasina chakamurwa. Kuturikirwa uku muchiShona kwakazodhindhwu nokugoverwa neve Voice Of God Recordings.

SHONA

©2023 VGR, ALL RIGHTS RESERVED

VOICE OF GOD RECORDINGS, ZIMBABWE OFFICE
8 ST. ANNES ROAD, AVONDALE, HARARE, ZIMBABWE

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Chiziviso chekodzero

Kodzero dzose dzakachengetedzwa. Bhuku iri rinokwanisa kudhindhwapi papirinda yekumba kuti ushandise uri iwe pachako kana kugovera kunze, usingatengesi, semudziyo wekuparatzira Evhangeri yaJesu Kristu. Bhuku iri harigoni kutengeswa, kudhindhwapi akawanda, kuiswa pawebhusaiti, kana kuwana mumuchina waringachengeterwa, kuturikirwa mune mimwe mitauro, kana kushandiswa kukumbira mari pasina mvumo yakanyorwa nevekuVoice Of God Recordings®.

Kuwana umwe umboo kana zvimbewo zviripo zvingawanikwa, tapota nyorerai:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org